

# REPROBATIO LYDII LAPIDIS

S E U

BREVIS REFUTATIO  
TRACTATUS,

*Quem Doct.*

D. FRANCISCUS  
P E R E A

Pro defensione Probabilismi  
edidit Salmanticæ  
anno 1697.

A U C T O R E

P. ADAMO EHRENTREICH  
SOCIETATIS JESU,

*Sacrae Theologiae Doctore.*



ROMÆ, MDCXCIX.

Typis Lucae Antonii Chracas, propè  
Curiam INNOCENTIANAM.

*Superiorum Facultate.*

*Imprimatur,*

Si videbitur Reverendiss. Pat.  
Sac. Pal. Apost. Mag.

*Dominicus B. de Bellis Episc.  
Melphicten. Vicesg.*

---

*Imprimatur,*

Fr. Paulinus Bernardinius Sacri  
Palatii Apost. Magister, Or-  
dinis Prædicatorum.

# PRÆFATIO.

**C**UM ad finem mei, de usu Probabilitatum, Opusculi Impressor pervenisset; oblatus est mihi Tractatus quidam, Lydius Lapis Recentis Antiprobabilissimi inscriptus: qui magnum in Hispania plausum tulisse dicebatur. Cepi avidè legere. Sed quia nihil, quod vel ingenium, vel eruditionem supra mediocritatem commendaret, invenire potui; eò mihi connitendum putavi, ut quam sua benevolentia, non libri merito, nonnulli æstimationem conceperant, eam penitus ex illorum animis evellerem.

Quam ob causam brevi refutatione singulas ex ordine materias aggressus sum; ea, ut spero, efficacia ac soliditate, ut non tantum ad cognoscenda sententiæ oppositæ pericula, sed etiam ad nostræ intelligendam veritatem, & securitatem amplectendam, plurimum lucis ac præsidii sit accessurum.

Illud moneo, me de industria dissimulasse, quòd nostræ sententiæ frequenter

*Jansenismum impingat hujus Lapidis  
Author . Nam in Introductione pag. 1.  
ait : parti rigidiori ( hoc est , probabi-  
lora requirenti ) aut solos , aut ple-  
rumque Jansenistas favere , & p. 2.  
disputationis sensu proposito , subjungit :  
hoc negant pauci Recentiores ,  
quorum numerum implent Jan-  
seniani , & de Jansenismo suspe-  
cti , & sect. 1. Antiprobabilismus  
emerfit ex quibusdam malæ , &  
Jansenianæ notæ Lovaniensibus .  
Hæc , inquam , de industria dissimulavi .  
An enim Illustrissima Schola Thomisti-  
ca , cum suo Angelico Doctore : tot Ec-  
clesiæ , in Gallia præsertim , virtute ac  
doctrina Eminentissimi Reverendissimi-  
que Episcopi : Ipsi denique Summi Pon-  
tifices , Probabilismum prohibitionibus  
suis coercentes , Jansenianum quid sa-  
pient : hoc examinare , non ad privatum  
disputatorem , sed ad ipsa summa Tri-  
bunalia pertinere existimavi . Quorum  
judicio hoc totum ; uti & mea , quæ  
dicturus sum , obedientissimè , humilli-  
mèque submitto .*

NO-



## NOTULA, ET INGRESSUS.

*Procedo cursim per librum , eo ordine , quo  
ab Authore dispositus est : ut qui  
ipsum habent , facile con-  
ferre possint .*



**ECT. I. num. 4. pro sen-**  
tentia , ut vocat , beni-  
gna , sic argumentatur :  
opinio , quam Authores  
sapientissimi , quamvis  
loco , tempore , & insti-  
tutis separati ; nec unus , aut duo , sed  
omnes aperte , frequenter , perseveran-  
terque tenuerunt , prudentissimè tenen-  
da est : at talis est opinio benigna ; ergo  
tenenda .

Majorem admitto . & minorem , fal-  
tèm æquè veram , quàm sit minor DD.  
Perea , hanc substituo : sed quòd liceat  
judici sequi minùs probabilem ; item  
Medico in dandis medicinis ; & mini-  
stro in administratione Sacramentorum ,  
& universim , modò de finibus probabi-  
litas non exeatur , tenuerunt sapien-  
tissimi viri : ergo hoc prudentissimè te-  
nendum est : ergo imprudentissimè ab  
Ecclesia damnatum est : non enim , quæ  
prudentissimè tenentur , & tenenda sunt ,

videntur prudenter damnari . Hoc non libenter dicet de Ecclesia Perea ; ergo videat , quàm periculosè argumentetur .

Unde contra benignam sententiam potius sic licebit arguere : quod propositionibus ab Ecclesia damnatis simillimum est , nititurque eodem fundamento , & eisdem periculis exponit , atque similiter bonis moribus præjudicat , & laxitatum januam, quam Summi Pontifices claudere per has prohibitiones voluerunt , perniciosè servat apertam ; id tanquam valde suspectum , est fugiendum, & minimè tenendum : sed sententia benigna hoc habet ; ergo non est tenenda .

Eodem modo obviari potest confirmationi, quæ num. 6. proponitur, quòd Deus in conscientia directione permisisset Doctores errare . probaret enim, quòd neque errassent Benignistæ , asserendo judici, medico, ministro, & universim cuilibet probabilitati liberam, praxin; adeòque quòd Ecclesia immeritò has praxes damnasset .

Eadem sect. 1. num. 7. dicit , RR. P. Thyrsus vulgasse suum , de usu Opinionis Probabilis , librum , dissentiente Societate universa .

Non video, quomodo hoc defendere pos-

possit Perea . nam RR. P. Thyrsus, edidit librum illum post Congregationem Generalem , qua caput Societatis electus est . in illa autem Congregatione, speciali Decreto declarata est ab universa Societate facultas tenendi sententiam rigidiorē seu temperatam : quomodo ergo dissentiente tota Societate librum hujus doctrinæ edidit ? num idem est , Societatem totam aliquid declarare ac permittere , ut fiat ; & dissentire, ut fiat ?

Deinde vix unquam fuit Societas congregata , ubi opinandi licentiam , non omni modo decreverit , & petierit esse cohibendam : quomodo igitur dissentiente universa Societate editus est à capite Societatis liber , in quo illa licentia , non vi , nec pœnis , aut minis, sed solidè docendo suaviter coercetur ? Quomodo etiam Societas vult , & præscribit Professori Theologiæ Moralis, ut resolutiones det secundum probabiliora ; Si librum hoc ipsum requirentem & docentem invita tulit lucem videre ? non facile hæc Perea combinabit .

Eadem sect. num. 9. conatur ad grande absurdum deducere: quia, inquit, tali modo vix ullus erit confessarius , si operans in nullo possit aliis fidere , sed suam solummodo teneatur sequi opinio-

nem , quam non possit , nisi re accuratè examinata formare .

In hoc , falsum supponit oppugnans. quia non docet RR. P. Generalis , non posse nos etiam aliis quandoque , & in quibusdam fidere : sed solum tunc , quando clarè cognoscimus , alios notabiliter viciniore esse errori , quàm veritati ; & quando tempus habemus examinandi illorum rationes : tunc enim tenemur illas rationes examinare . nam ad hoc constituti sunt Doctores , & ad hoc operam dederunt studiis Litterati , ac libros habent diversos , ut collatis rationibus possint videre , quid sit agendum , & quid illiteratis consulendum , quomodo dirigendi .

Deinde totum retorquetur . Si enim , quos nos requirimus , impossibile , & nimis onerosum est , ita ut vix ullus sit futurus confessarius , aut Magister , cùm ad rationes examinandas non videatur ætas hominis sufficere : erit hæc ipsa impossibilitas , & onus apud adversarios ; qui non possunt asserere , nisi probabilitatem , *comparativam* , hoc est , quam quis cognoscit adesse , non obstantibus contrariis opinionibus . nam hanc probabilitatem cognoscere non potest , nisi perpendis fundamentis illarum opinionum : ergo si illæ aliæ opiniones perpendi à  
ne.

nemine , aut vix ab ullo possint , & hoc sit onus nimium ; sequitur , quòd in usu opinionis minus probabilis *comparativa* , sit impossibilitas , vel onus nimium : ergo admittenda erit , quæcunque & quantumvis levis probabilitas : quod est prohibitum . Si ergo requirere probabilitatem comparativam non est impossibile , vel nimium ; neque impossibile erit , aut nimium , comparare sibi notitiam , quid sit probabilius : nam hoc , & comparativa probabilitas , eodem negotio , & cognitione acquiruntur . unde si potest haberi in promptu comparativa probabilitas , ut non sit necesse , sæpe ex impetu voluntatis procedi ; neque erit necesse hoc fieri ob requisitam probabilitatem majorem .

Sect. 2. num. 12. affert textum S. Antonini , dicentis , ceteris paribus benignam potius quàm duram esse faciendam interpretationem circa præcepta : quòd præcepta Ecclesiæ , & Dei non sint ad tollendam omnem spiritualem dulcedinem : quâlis certè tollitur , quando nimis scrupulosè , & timidè præcepta interpretantur . & hoc textu , quasi nobis è diametro contrarius esset , gloriatur .

Quasi verò *cetera paria sint* , si quis alteram opinionè ob notabiliter excedentes oppositas rationes non possit prudenter

judicare non erroneam ? quasi verò nos tam rigidissimus , *ut omnem tollere velimus spirituales dulcedinem ?* quin imò adversarius nimis delicatus est , si ipsi amarum videatur , non permitti ipsi , ut agat , quod prudenter honestum judicare non potest . quasi verò qui vult , non agendum , si prudenter judicari non potest honestum , *is nimis scrupulosè & timide præcepta interpretaretur .*

Eadem sect. 2. num. 13. ait , nos malè sistere in textu S. Antonini , quo concedit , posse hominem eligere ex opinionibus illam , quam credit probabiliorē : progrediendum enim esse ulterius ad illa verba : *& præcipue , quando non invenit aliquid , quod eum sufficienter moveat ad hoc , quod sit illicitum .* Ex quo sic argutatur num. 14. ecce , secundum S. Antoninum licitè operatur homo , qui eligit eam partem , pro qua non invenit aliquid , quod eum sufficienter moveat ad judicandum , illam esse illicitam : sed per vos , quando apparet utraque pars æquè probabilis , non invenit aliquid movens sufficienter ad judicandum , eam partem esse illicitam ; neque id potest prudenter asserere , ut vos ipsi decernitis : ergo tunc potest rectè sequi illam partem juxta S. Antoninum .

Optimè argumentatur pro nobis ad-  
ver-

versarius . quod facile perspiciet, si modò, quod à nobis exigit , etiam ipse observet , & textum S. Antonini integrum accipiat, notando, S. Antoninum concedere electionem, cum hac expressa limitatione : *dummodò ex contrarietate talium opinionum non inducatur ad dubitandum .* quod juxta nos fit , quando rationes utrinque sunt æquales . jam , si potest , adhibeat suum argumentum , & subsumat gloriosè . S. Antoninus concedit electionem , si non inveniatur movens sufficienter ad judicandum , quòd actio sit illicita, & *si non inducatur ad dubitandum : sed per vos [ Antiprobabilistæ ] non invenitur movens sufficienter ad judicandum , quòd actio sit illicita , sed tamen inducitur ad dubitandum : ergo potest rectè sequi illam partem juxta Sanctum Antoninum , qui requirit , ut non inducatur ad dubitandum .* Vides , argumenti tui quanta sit vis contra nos ? quàm aptè conveniat menti S. Antonini ? quàm longè dignius tractetur hic textus à RR. P. Generali , qui ex eo sic procedit : juxta S. Antoninum licet eligere opinionem, quando non invenitur movens sufficienter ad judicandum , quòd sit illicitum, & quando non inducitur ad dubitandum : sed hoc solùm fit, quando altera pars eligitur, ut probabili-

lior ; tunc enim neque dubitatur ; cùm formetur ex probabiliori firmum iudicium ; neque pro opposito est sufficienter movens : cùm minor ratio contra maiorem & probabiliorem non sit sufficiens : ergo non licet juxta S. Antoninum eligere opinionem , nisi probabiliorem .

Deinde , si , existentibus paribus rationibus , non datur sufficiens motivum ad judicandum , quòd actio sit illicita , ut nobiscum modò sumit arguens : quomodo nobiscum , aut cum S. Antonino sumet , dari sufficiens movens ad judicandum , quòd actio sit licita ? certè fateretur , nos id non sumere : ergo sic ex nostris nos arguit , ut sumat , quæ non sumimus . qui est bellissimus arguendi modus .

Neque ex S. Antonino id sumere potest ; donec ostendat , gravissimum hunc Doctorem censuisse , ex rationibus æqualibus , natura sua inducentibus in prudentem dubitationem , absque ullo dubio prudenter judicari inæqualiter ; sive ex iudicio rationis , commensurante se naturaliter meritis rationum , tribui uni rationi tantum , quia tantum meretur ; alteri tribui minus , quia non minus , sed æquè tantum meretur , utpote æqualis .

Ex se igitur , & ex suo probabilismo ,



rationum merita aut respiciente , aut negligente pro suo arbitrio , sumit prudenter & secundum rationem inæqualiter judicari , ubi tantum adsunt rationes suadentes , æqualiter judicandum: vel potius intra dubium & æquilibrium standum esse . quam prudentiam, contra Dei præcepta adhibitam , Antiprobabilistæ coram Deo sibi non optant . Solis igitur Probabilistis , & præcipuè arguenti , quandoquidem ita velit , hæc prærogativa relinquatur ; *quòd ipsis sufficiat ad prudenter judicandum, si non adsit sufficiens motivum ad prudenter judicandũ.* & *quòd rationes notabiliter probabiliores & majores ad judicandum prudenter, actionem esse illicitam non sint sufficientes illis ad hoc prudenter judicandum; non obstante , quòd hoc evidenter prudentius judicetur .*

Eadem sect. 2. num. 17. postquam retulit ex S. Antonino , Albertum Magnum respondisse , quòd frater simplex, vel quilibet homo [ intellige simplex & rudis ] possit sequi quancunque opinionem voluerit : dummodo alicujus Doctoris magni opinionem sequatur : subjungit arguens , nihil dici potuisse magis contrarium Antiprobabilistis , juxta quos nemo potest sequi opinionem Doctoris, etiam magni, quam voluerit; sed  
so-

solum potest sequi suam opinionem, cui ipse ut probabiliori assentitur ex propositis motivis; inde etsi dentur opiniones valde fundatæ & receptæ magnorum Doctorum, clamant, non posse hominem sequi, quam voluerit.

Sed, quæso, quomodo Antiprobabilistæ nemini, etiam simplici, qui rationes dijudicare non potest, permittunt sequi sententiam magni Doctoris: qui hoc expressè negant, tunc fieri posse, quando post rationes utrinque accuratè pensatas, inveniuntur rationes magni illius Doctoris notabiliter minores? à quibus accuratè pensabuntur, & inveniuntur cum illo excessu discriminis, ac insufficientiæ? à simplicibus? clarum, quòd non. ergo clarum, quòd auctoritas allegata non ad rem, & ex falsissimo supposito; quasi nos prudentiam Doctorum, simplicibus, & rusticis, non autem solis doctis examinandam relinqueremus, & vellemus, cæcos vel sine ducibus ire, vel ducum duces esse. Eruditos verò debere examinare sententias, & non posse sequi Doctorem, quem clarè viderint probabilius falli, aut de cuius doctrinæ veritate meritò indubium inducantur, non tantum non est contra S. Antoninum; ut qui in textu num. 13. ab adversario adducto, ad li-  
cen-

centiam sequendi expresse requirat, ne aliquis in dubium opinionis, quam sequi vult, inducatur: quod utique fit, si pro opposito clarè deprehendat rationes firmiores: sed neque est contra Albertum, nec contra Hostiensem, nec Magistrum sententiarum. & si hi reclamarent in hoc casu, reclamaret contra illos S. Thomas, expresse negans, posse inter Doctorum sententias probabiles quamcunque pro libitu eligi; ut ipse arguens allegat num. 16. cujus quidem sancti clamorem, acclamante simul ipso lumine rationis, præ aliorum clamore sic audimus, & ad alia omnino surdissimi.

Eadem sect. 2. num. 18. ex eodem S. Ant. affert, inter opiniones præstandam esse, quæ est humanior & æquior, hoc est, benignior, & congruens humanitati & æquitati. quid tum? etiam nos hoc dicimus cum S. Antonino, sub illo ab hoc Sancto addito, *ceteris paribus*, hoc est, concurrentibus, necessariò requisitis: inter quæ est, ut opinio prudenter possit judicari vera, non dubitetur circa ipsam &c. quæ minimè habentur, ubi vel rationes talis opinionis clarè apparent minores, vel nulla ratione majores oppositis.

Item affert ex eodem Sancto, & in  
api-

folùm poteft fequi fuam opinionem, cui ipfe ut probabiliori affentitur ex propofitis motivis ; inde etfi dentur opiniones valde fundatæ & receptæ magnorum Doctorem, clamant, non poffe hominem fequi, quam voluerit.

Sed, quæfo, quomodo Antiprobabiliftæ nemini, etiam fimplici, qui rationes dijudicare non poteft, permittunt fequi fententiam magni Doctorem : qui hoc expreffè negant, tunc fieri poffe, quando poft rationes utrinque accuratè penfatas, inveniuntur rationes magni illius Doctorem notabiliter minores ? à quibus accuratè penfabuntur, & inveniuntur cum illo excessu discriminis, ac infufficientiæ ? à fimplicibus ? clarum, quòd non : ergo clarum, quòd authoritas allegata non ad rem, & ex faliffimo fupposito ; quafi nos prudentiam Doctorem, fimplicibus, & rusticis, non autem folis doctis examinandam relinqueremus, & vellemus, cæcos vel sine ducibus ire, vel ducum duces effe. Eru-ditos verò debere examinare fententias, & non poffe fequi Doctorem, quem clarè viderint probabilius falli, aut de cujus doctrinæ veritate meritò indubium inducantur, non tantùm non eft contra S. Antoninum ; ut qui in textu num. 13. ab adverfario adducto, ad li-  
cen-

centiam sequendi expressè requirat, ne aliquis in dubium opinionis, quam sequi vult, inducatur: quod utique fit, si pro opposito clarè deprehendat rationes firmiores: sed neque est contra Albertum, nec contra Hostiensem, nec Magistrum sententiarum. & si hi reclamarent in hoc casu, reclamaret contra illos S. Thomas, expressè negans, posse inter Doctorum sententias probabiles quamcunque pro libitu eligi; ut ipse arguens allegat num. 16. cujus quidem sancti clamorem, acclamante simul ipso lumine rationis, præ aliorum clamore sic audimus, & ad alia omnino surdissimi.

Eadem sect. 2. num. 18. ex eodem S. Ant. affert, inter opiniones præstandam esse, quæ est humanior & æquior, hoc est, benignior, & congruens humanitati & æquitati. quid tum? etiam nos hoc dicimus cum S. Antonino, sub illo ab hoc Sancto addito, *ceteris paribus*, hoc est, concurrentibus, necessariò requisitis: inter quæ est, ut opinio prudenter possit judicari vera, non dubitetur circa ipsam &c. quæ minimè habentur, ubi vel rationes talis opinionis clarè apparent minores, vel nulla ratione majores oppositis.

Item affert ex eodem Sancto, & in  
api-

apicibus juris , ubi dubitant sapientes , dari ignorantiam excusabilem . Neque nos requirimus , scrupulosè omne dubium speculativum esse circa quascunq; possibiles altercationes amoliendum : sed solidè rem considerandam , & proportionaliter ad hanc considerationem operandum : reliquas autem minutias , & inanes indagines otiosis disputantibus remittendas . aliud igitur est , requirere diligentiam ordinariam , & moralem ; aliud summam , & moraliter impossibilem . priorem requirimus : ad posteriorem nos refert adversarius ; apud quem statim summa requirit , qui non omnem negligentiam permittit .

Eadem sect. 2. num. 19. & 20. ait etiam apud antiquissimos , & Juristas receptissimum fuisse , sententias benigniores præferendas . Verum est , cum hoc addito , *si potuerunt prudenter judicari vera* . Si autem hoc non , negamus , & semper negabimus , apud prudentes hanc viguisse consuetudinem , ut eligerent , quod non poterant prudenter judicare bonum , justum , laudabile &c.

Sect. 3. num. 21. exponit sententiam Probabilistarum in hunc modum : sententia benigna docet , quòd concurrentibus duabus opinionibus circa aliquod opus , quarum una dicit illud esse licitum ,

tum , altera verò illicitum , inspiciendum est à viro docto , & consulto , an utraque habeat gravia fundamenta rationis, gravesque pro se Authores: quod si inveniatur esse in his æquales , posse ipsum consulere , vel etiam sequi opinionem de licito, & depellere omne dubium, timoremve prudentem, ita ut formet judicium moraliter certum de eo, quòd sic operans & consulens, non peccet formaliter , quidquid sit de veritate talis opinionis à parte rei . quod quidem judicium moraliter certum , non potest colligere ex principiis directis, versantibus circa ipsam veritatem rei , & licentiam contractus v. g. secundum se ; eò quòd hæc principia sint incerta: sed debet colligere judicium istud moraliter certum, ex principiis reflexis , & extrinsecis ; quæ nimirum ita circumstant contractum hic & nunc , ut hominem, qui init contractum, reddant irreprehensibilem , licet fortassis contractus secundum se, & in rei veritate illicitus & reprehensibilis sit . talia autem principia sunt: adhibita conveniens diligentia , post quam non fuit inventum aliquid sufficienter movens ad judicandum , contractum talem esse illicitum : item autoritas Doctorum , qui dicunt, in tali incertitudine hominem irreprehensi-

hensibiliter operari ; eò quòd diligentia illa excuset errorem , si quis fortè re ipsa committatur in tali contractu ; & adstruat ignorantiam invincibilem , propter quam nemo puniri , aut reprehendi possit . Unde ex his principiis extrinsecis sic formabit sibi judicium moraliter certum , quòd formaliter non peccet , sivè quòd ob talem contractum irreprehensibilis sit : Qui post convenientem diligentiam non invenit aliquid , sufficienter se movens , ad judicandum , talem contractum sibi esse illicitum , non est propter talem contractum initum reprehensibilis , & judicio Doctorum , & ex ipsa ratione : nemo enim reprehenditur ex eo , quòd faciat aliquid re ipsa reprehensibile , si post convenientem diligentiam non viderit esse reprehensibile : sed ego hic & nunc post convenientem diligentiam non invenio aliquid sufficienter movens ad judicandum , contractum mihi esse illicitum ; eò quòd æquè magnæ sint rationes pro licentia : ergo faciens hic & nunc [ in circumstantia talis diligentiae , & absentia motivi sufficienter suadentis inhonestatem , aut ostendentis prohibitionem ] hunc contractum , non pecco formaliter , sive non sum reprehensibilis . ita ferè Perea , hanc ipsam doctrinam



nam num. 22. extendens ad casum , ubi inveniuntur motiva pro una parte minora , seu minùs probabilia , & pro altera majora , sive magis probabilia : eò quòd magis & minus non varient speciem : & major probabilitas , cùm minorem probabilitatem non enervet , penitusque levem constituat , non sit sufficiens fundamentum , ex quo aliquis judicet , contractum , ob rationes probabiliore , esse illicitum .

Contra hanc doctrinam plura occurrunt . Primò dicit , quòd debeant examinari opiniones Doctorum , ut videatur , an rationes utrinque afferantur graves , & an ipsi etiam Doctores sint gravis authoritatis : & quia doctrinam hanc extendit ad minùs probabile , respectu magis probabilis , examinandum erit , an in comparatione majorum rationum , minores rationes maneant adhuc verè graves , vel potiùs reddantur leves . & tamen num. 9. dicit contra nos , examen istud esse moraliter impossibile , & vix ullum tali modo fore confessarium , aut Magistrum , futurumque , ut plurimi committantur errores , & casus morales resolvantur ex impetu voluntatis , non verò ex prævalenti ratione . Valde dedecet Doctorem , ea pro sua doctrina requirere , quæ aliis tanquam  
absur-

absurda , impossibilia, & noxia objicit.

Secundò dicit, quòd inventa æqualitate rationum [ vel etiam minore probabilitate contra majorem ; cùm doctrinam etiam ad hunc casum extendat ] possit quis consulere , vel etiam sequi opinionem de licito , & *depellere omne dubium , timoremve prudentem* . Absit hoc à sapientibus , ut illi non dubitent, aut timeant , ubi prudenter dubitandum , aut timendum est : *prudens timor*, bonus & laudabilis est ; non igitur depellendus, sed fovendus est: sapiens enim metuit, stultus verò confidit, & transilit.

Tertiò dicit, quòd ex hac prudentis timoris depulsione formetur judicium moraliter certum, quòd sic operans non peccet formaliter, quidquid sit de veritate talis opinionis à parte rei . Præclarus fructus depulsi prudentis timoris, & prudentis dubii ! ut non sit cura veritatis : ad quam tamen ante omnia respiciendum erat ; cùm propter hanc diligentia adhibeatur . Præclara etiam diligentia inveniendæ veritatis ; cùm illam prope inveneris , non curare de illa, & studiosè te ab ea parte avertere, in qua magis esse apparet, nempe in parte notabiliter probabiliore : ne scilicet exponas te valde vicino periculo inveniendi veritatem, & incidendi in illam !

ò Pe-

ò Perea , si cui suaderem , ut ubi majora veritatis vestigia videret , inde recederet , nunquid suaderem , veritatem magis fugere & declinare , quàm indagare ? tua igitur diligentia , quæ majoribus veritatis indiciis tergum vertit , vitandæ potius quàm inveniendæ veritatis diligentia est : non igitur ex illa , potes tibi formare judicium moraliter certum , quòd sis irreprehensibilis .

Sed audiamus fundamentum , quare hæc diligentia [ sive illam vitandæ , sive inveniendæ veritatis dicamus ] irreprehensibilem præstet ? itaque .

Quartò dicit , hanc diligentiam excusare , quia post illam non invenit aliquid , nec ipse , nec viri docti , sufficienter movens ad judicandum , hoc esse illicitum . Quàm manifesta contradictio ! dixisti , quòd quando dantur duæ opiniones circa aliquod opus , quarum una asserit illud esse illicitum , altera verò licitum , possit operans , si inveniatur rationes esse æquales , sequi opinionem de licito . quomodo judicarunt docti , hoc vel illud esse illicitum , si non invenerunt rationem , ad hoc judicandum , sufficienter moventem ipsos ? quod si ratio ipsis sufficiens , tibi non sufficiat : ecce quàm incidas in id , quod nobis objicis , nolle nos prudentum judicio

ac-

acquiescere ; sed examinare illorum dicta, & ubi apparuerint insufficientia, & veritati minus vicina, relinquere. tu examinas, & quidem, ut ais, diligenter, & non invenis sufficienter moventes, & ideo relinquis, & certus es, te bene facere : nos autem hæc eadem facientes, superbi sumus, & illud monitum negligimus, *ne innitaris prudentiæ tuæ!*

Rursus [ quia idem doces de opinione magis probabilia ] quomodo non invenis sufficienter movens ad judicandum, hoc esse illicitum ; si post accuratam tuam diligentiam invenias, rationes adstruentes illicitum, esse notabiliter majores ? nunquid ratio notabiliter major sufficere potest ad affirmandum suum objectum, si ratio notabiliter minor sufficiat ad affirmandum suum ? nunquid quod omnes docti asserunt prudenter judicari, hoc etiam tibi ad judicandum sufficere possit ? atqui omnes docti asserunt, secundum rationes probabiliores prudentius judicari, & quod illæ dissuadent, prudentius omitte, quamvis non velint, dari obligationem ad hanc majorem prudentiam : ergo Domine Petrea, si non nimis innitereris tuæ prudentiæ, invenires post tuum examen aliquid, saltèm ex parte opinionis probabilioris, sufficienter movens, hoc vel il-  
lud

lud esse illicitum : ergo secundum S. Antoninum , non potes sequi opinionem oppositam minus probabilem : ergo vides, quam malè ipsum pro te adducas , & quam malè nos arguas, quòd ipsum pro nobis adducamus .

Præterea . vel illis viris doctis , qui asserunt, aliquid esse illicitum, nihilominus licitum est , illud facere , vel non ? si non : dic rationem , cur viris doctis non liceat , quod tibi licet : & cur non & ipsi , quibus aliqua cura veritatis est, possint non obstante sua opinione speculatiua , aliorum se opinioni in praxi conformare ; cum hoc tibi liceat , qui non curas de veritate , qui certus es , te non peccare formaliter , *quidquid sit de veritate à parte rei* . & quomodo Jesuitæ , si quod docent , esse cuiusvis licitum relicta opinione propria sequi alienam, ipsi non practicent, nec liceat ipsis practicare : quomodo , inquam , non sunt ficti & simulatores, docentes , conscientias aliter dirigendas esse , quàm ipsi dirigant , & dirigere bona conscientia possint ? à qua simulatione , utpote absurdissima num.7. ipsos vendicas , arguens , vel tuam sententiam esse veram, vel omnes labores Societatis hactenus fuisse phantasticos, perniciosos, & fictos, atque ad fraudem compositos ?

Quòd si

Quòd si viris doctis , qui censent , aliquid esse illicitum , nihilominus liceat illud facere : ergo destruis auctoritatem S. Antonini , quam ais maximè & apertè pro te esse ; & indecenter calumniaris num. 14. illum à RR. P. Thyrsò sine ingenuitate & fide truncato contextu pro se , ac opposita sententia afferri . destruis , inquam , auctoritatem S. Antonini ; quia hic S. D. ait , licitum esse sequi alteram opinionem de licentia , *si non invenerit , aliquid sufficienter movens ad judicandum , esse illicitum* : ergo secundùm S. Anton. non licebit sequi opinionem oppositam , his viris , quia illi invenerunt aliquid sufficienter ipsos movens ad judicandum , esse illicitum : aut certè imprudenter judicarunt , esse illicitum , si non sufficienter moti judicarunt . vides ergo , vel viros doctos à te dici imprudentes ; vel S. Antoninum tibi esse contrarium ; & nobis summè amicum ac consentientem ; vel tibi plus licere , quàm prudentibus : imò te tibi , & omnibus aliis concedere , quod prudentibus concedere non possis ; nempe ut ipsi , contra suam opinionem , operentur secundùm opinionem aliorum æquè , vel minus , verè tamen probabilem .

Fundamentum tuum breviter distinguo.

guo . Si non invenitur , aliquid esse illicitum , teneri potest pro licito , nisi tanta , vel etiam major sit ratio prudenter timendi , ne sit contra legem Dei , quanta est fiducia , quòd sit juxta legem , conc. Si prudenter æquè , vel magis timeatur in tali actione transgressio legis re ipsa , & secundum se , nego . cum enim homo teneatur evitare transgressionem materiale , quantum potest moraliter , non debet , nec potest , illam non curare , cum videt esse omnino vicinam , & prope moraliter certam . aliàs voluntas laudabiliter posset habere hunc modum tendendi : *quotiescumque intellectus , cujus ductum ego , tanquam potentia ceca , debeo sequi , dubitat , an actio , de qua ipsum consulo , sit honesta , & mihi dicit , esse magnum periculum , imò sibi videri notabiliter majus periculum inbonestatis realis in electione talis actionis : tunc ego laudabiliter talem actionem eligo , & securo vituperationis , periculum realis erroris ita ex vicino propositum amplector : atqui voluntas non potest laudabiliter habere hunc modum tendendi ; quia sic vel non daretur obligatio vitandi , & cavendi periculum , etiam vicinum , transgressionis realis , sed tantum certitudinem hujus transgressionis : vel laudabile foret , non curare obligationem cavendi tale periculum ,*

B

lum,

lum, & eo neglecto ex voluntaria audacia sibi fingere securitatem.

Atque hoc ipsum applicari potest ad principia extrinseca. Si enim viri docti, v.g. Probabilistæ, dicant, licitum esse sequi minus, vel æquè probabilem; tunc quoad sensum & rem ipsam sic dicunt: *est quidem magnum, imò notabiliter majus periculum transgressionis realis in electione talis actionis; nihilominus hæc actio, & hoc periculum transgressionis realis laudabiliter eligitur; & laudabiliter suadetur di proprio intellectu, voluntati sibi sueque directioni commissæ.* atqui hoc est absurdum dictamen, & principium minimè audiendum: dicit enim clarissimè, non esse obligationem cavendi periculum vicinum realis inhonestatis; aut saltem non esse curandam talem obligationem, & laudabiliter non curari: quod est à ratione extraneum, & contra modum tendendi proprii intellectus, qui viso periculo non dicit voluntati: est magnum periculum, habes, meritò quod metuas, attamen non cura. sed potius dicit sic: est magnum periculum, cave, & quia unum eligendum est, oppositum elige, in quo parum admodum & ferè nihil apparet periculi materialis; ut eligendo periculum minus, ostendas, te minimè amasse periculum, sed aliquid  
ejus



ejus sola necessitate elegisse ; quod non faciet, ut *percas* in tali periculo, vel ejus electione . patet ergo, per Probabilistarum principium non dirigi, sed precipitari voluntatem .

Sect. 3. num. 23. dicit, contra opinionem benignam insurrexisse Recentiores, plerosque aut Jansenistas, aut de Jansenismo suspectissimos: qui docuerunt, quòd opinio etiam probabilissima non excuset à peccato: qui error nuper damnatus fuit . Quid hoc ad rem, dum disputat contra R.R.P. Thyrsus, qui pariter & nimio illi rigori, & nimis laxitati Probabilistica infensissimus est . Si Perea per damnatum extremum rigoris, exosam vult facere sententiam temperatam, reddemus & nos exosum probabilissimum per damnatam à Pontificibus nimiam laxitatem .

Sect. 3. num. 30. ait, quòd Elizalde, sive per Anagramma Celladei, fateatur, se olim fuisse Probabilistam, & sententiæ communi maximè addictum . deinde verò mutasse sententiam, & existimasse dari obligationem sequendi probabiliora . tandem verò cognovisse, nec sufficere hanc regulam de sequendis probabilioribus: atque sic sistendum esse in sola veritate; ita ut sola opinio vera sit recta morum regula . Videamus ex  
B 2 ipso

ipso Elizalde, an à sententia Probabilioristarum recesserit. Parte 1. lib. 1. quæst. 1. §. 4. postquam secundo loco de opinione obligante ad sequenda probabiliora dixit, illius numerum in dies ita crevisse, ut inter communes jam opiniones censerī jure debeat: sic subjungit: laudo, & accipio, non, ut quidam oscitanter judicarunt, improbo Auctores secundæ opinionis, neque adversus illos, sed magis præter illos, aliquid videor adducere. Eò enim ipsi toti incubuerunt, ut edocerent, opiniones minus, aut æquè probabiles contra legem, regulam morum non esse; *sed quoties opinio adest, vel æquè probabilis, vel probabilior pro lege, nos obligari omnino ad legem. in quam ego universam doctrinam non solum non pugno, sed eam toto opere, singulis ejus quæstionibus, & ubique statuo, & tanquam in re mihi clarissima efficacius etiam fortè ago, quàm vellent Adversarii. & paulò infra: quòd si nihilominus, me illis adversari, arbitraberis, hoc gratiæ peto, ut non te, qui utrisque es contrarius, sed ipsos illos doctrinæ suæ satis intelligentes judices habeam: expertus enim loquor, & me, & illos improbari magis à quibusdam, quàm considerari. ita Elizalde. manifestè contestans, se totum esse ex parte, probabiliora requirentium. qua igitur ingenui-*

genuitate [ ut suas illi querelas, quas calumniosè contra RR. P. Thyrsum, aliòsque nostræ sententiæ Patronos, piperis loco adspergit, regeram] qua fide Perea dicit, quòd Elizalde à nostra opinionione recesserit ?

Sect. 3. num. 31. de Elizalde sic dicit : nihilominus assignat quoddam probabile, quod appellat reale positivum, & hoc dicit esse rectam, morum regulam . At quodnam est probabile hoc ? an pars tutior ? an pars mihi, vel aliis probabilior, etsi forte falsa sit ? *negat hoc Celladeus, expressè docens, nullam opinionem re ipsa falsam, esse probabilem.*

Sed quæso te, D. Doctor Perea, ubi hoc Celladei negat ? cur locum non citas ? existimo, quòd nunquam in manibus tuis Celladei fuerit, dum tam aliena ipsi affingis . lege cit. quæst. §. 3. ubi sic habet : *contingit porro, & veras, & falsas innumeras opiniones, quibus libri implentur, probabiles esse, falsas aliquando etiam probabiliores, quin veras non semel haberi improbables.* lege etiam §. 4. ubi sic ait : *profectò indubitatum est, & plurimas falsas doctrinas probabiles esse, quin, non opinio, sed proverbium est, aliquando falsa esse probabiliora.* qua igitur ingenuitate [ usurpo iterum jure optimo contra te, quod tu malè contra alios



clarissimos viros] qua fide Domine Doctor dicis, quòd Elizalde *expressè doceat, nullam opinionem re ipsa falsam, esse probabilem.*

Sect. 3. num. 32. refert quædam dicta ex Celladei, & inter alia, quòd peccet, qui falso iudicio difigitur, si erret vincibiliter: si tamen invincibiliter erret, non peccare. & hoc dictum laudat, sed validè, ut sibi imaginatur, illud impugnat ex aliis principiis Celladei. Sic igitur contra ipsum arguit: Si hoc dictum, quod verissimum est, jungatur cum doctrina Celladei, pessimam infert, & damnatam consequentiam; nempe istam: ergo opinio tenuis, aut etiam nullius probabilitatis excusat à peccato: quod est damnatum ab Innoc. XI. probatur. nam per te omnis opinio falsa, est tenuis, aut etiam nullius probabilitatis: sed per te opinio falsa ( quando est invincibilis ) excusat à peccato, ergo opinio tenuis, aut nullius probabilitatis excusat à peccato. Ità Perea. sed quàm tenuis, aut nullius probationis sit hoc argumentum, facilè apparet, si recognoscatur, quòd Celladei pro indubitato admittat, *plurimas falsas doctrinas probabiles esse, quin omnino falsa aliquando esse probabiliora.*

Sect. 3. num. 34. post Celladei tam

acu-

acuto argumento confixum , scilicet ,  
 &c. eadem subtilitate aggreditur RR. P.  
 Generalem, hoc modo: licet RR. Thyrsus nobis omnino placeat in eo , quòd  
 contra Celladeum docet , posse dari  
 ignorantiam invincibilem juris natura-  
 lis , displicet tamen in eo, quòd opposi-  
 tam sententiam , quam judicat falsam ,  
 adhuc appellat probabilem . hoc enim  
 repugnat huic Authori dissert. 3. cap. 3.  
 §. 2. ubi hoc assumit probandum : quan-  
 do opiniones sunt invicem oppositæ , &  
 veritas unius est falsitas alterius , non  
 manet absolutè probabilis respectu ope-  
 rantis pars illa , quæ ipsi proponitur ut  
 minus verisimilis , quia illam non potest  
 tunc approbare ut veram per pruden-  
 tem assensum . Nunc sic : opinio Cella-  
 dei apparet ut minus verisimilis , atque  
 item ut falsa RR. Thyrso affirmanti , &  
 tenenti ejus contradictoriam ; ergo ea  
 ipsa opinio Celladei non potest apud  
 eundem Thyrsum esse probabilis : & ta-  
 men apud illum est & dicitur probabilis ;  
 ut constat ex sua tertia propositione  
 capitali in secunda tabella , quam ap-  
 pendit in fronte operis sui ; ergo sibi  
 contradicit RR. Thyrsus . sic DD. Pe-  
 rea . sed facilè advertere poterat , affir-  
 mantem , & negantem de diversis , mi-  
 nimè sibi contradicere . Sciebat autem

DD. Perea [ nam hoc ipsum refert in  
introductione §. *Preambulæ observationes* ]  
apud RR. P. Thyrsum aliam esse proba-  
bilitatem subjectivam , & aliam objecti-  
vam . Secundum hanc igitur divisionem  
dicit , opinionem Celladei esse sibi pro-  
babilem, objectivè: & non esse sibi pro-  
babilem, subjectivè: & quæ in hoc con-  
tradictio ? in forma igitur , pro expo-  
lienda DD. Perea Philosophia , conc.  
ant. quòd RR. P. Thyrso opinio Cella-  
dei appareat ut minus verisimilis , & ut  
falsa . ergo ea ipsa opinio Celladei non  
potest apud eundem Thyrsum esse pro-  
babilis : dist. conf. non potest esse apud  
eundem probabilis subjectivè , conc.  
non potest apud eundem esse probabilis  
objectivè, nego conf. atqui tamen apud  
illum est & dicitur probabilis : distinguo  
subf. est & dicitur apud illum probabi-  
lis objectivè , conc. est & dicitur apud  
illum probabilis subjectivè , nego subf.  
ergo sibi contradicit RR. Thyrsus : dist.  
conf. si dicat , eandem opinionem sibi  
esse probabilem objectivè , & neget ,  
eandem sibi esse probabilem objectivè,  
conc. si dicat , eandem opinionem sibi  
esse probabilem objectivè, & neget, ean-  
dem sibi esse probabilem subjectivè ,  
nego conf.

Sect. 3. num. 35. transit ad alios Au-  
thores,

thores , à nimia laxitate Probabilistarum abhorrentes , & universim arguit illos de inconsequentia doctrinæ : nominatim autem Gonetum notat , aitque ipsum rationibus debilissimis uti : idque se in sequentibus ostensurum promittit . Expectemus hos Promissoris hiatus . Interim solum dico, si verum sit, M. Gonetum debilissimis argumentis uti ; illa simillima esse argumentis, quibus hactenus est usus DD. Perea .

Sect. 4. num. 36. ait , à Probabilistis, ad rectè agendum , requiri iudicium reflexum, moraliter certum, vñ cuius conscientia reddatur secura , quod hic & nunc non peccet . Antiprobabilistas autem dicere , tale iudicium vix , aut ne vix quidem esse possibile , multoque minus requisitum ad operandum sine peccato ; sed sufficere , quòd quis ex motivis probabilioribus iudicet, contractum istum esse re ipsa licitum ; iudicio videlicet firmo , & non fluctuante . deinde num. 37. & 38. mirabilem hinc oriri vicissitudinem infert , fieriq; ut quod Antiprobabilistæ obijciunt Probabilistis ; eos nimirum sua laxitate exponere periculis peccandi hominum conscientias : id ex Antiprobabilistarum doctrina nasci omnino ; ex Probabilistarum verò doctrina penitus removeri , perspicuè ap-

pareat . Se enim ab agentibus require-  
re, ut certitudinē sibi procurent, quòd  
licitè agant, & non peccent : Antipro-  
babilistas autem solummodo illis præ-  
scribere , ut habeant iudicium probabi-  
lius , opinativum , affirmans hunc con-  
tractum esse licitum, & permittens simul  
formidinem & timorem gravem & pru-  
dentem circa hoc ipsum , seu circa illi-  
citurum , & peccaminosum talis con-  
tractus .

Sed fallitur vehementer DD. Perea,  
dum existimat , Antiprobabilistas iudi-  
cium moraliter certum excludere . ma-  
ximè enim illud requirunt : atque ut ha-  
beri possit & idoneè præparant hominem  
per prudens ac firmum iudicium specu-  
lativum , sive versans circa ipsam mate-  
rialem honestatem actionis . Si enim  
quis videat, se , pensatis diligenter om-  
nibus , prudenter judicare , quòd verse-  
tur circa rem licitam , subungere pote-  
rit iudicium practicum , quo judicet ,  
*se licitè , & irreprehensibiliter operari ;*  
idque certò : quia certum est , non esse  
reprehensibilem, qui fecit, quantum po-  
tuit . quòd si verò , pensatis diligenter  
omnibus, videat homo, valde verosimi-  
le esse , ac notabiliter probabilius , se  
versari circa rem illicitam , ajunt Anti-  
probabilistæ, vix, ac ne vix quidem pos-  
sibile



sibile esse, subungere illud iudicium  
practicum: atque adeò Probabilistas,  
dum illud nihilominus in talibus cir-  
cumstantiis elici volunt, suadere homi-  
nibus, ut videntes pericula peccandi,  
non videant, nec timeant, ubi ratio ma-  
ximè suadet timendum: quod non est  
aliud, quàm securitatem longè pericu-  
losissimam offerre; per quam peccata  
non vitentur, nec excusentur, sed fiant,  
& culpabiliter facta esse ostendantur.

Totum, quod dico, habetur in aurea  
illa Synopsi, quæ ex mente R.R. P. Ge-  
neralis prodit, & primùm Tyrnaviæ,  
deinde octo aliis in locis lucem aspexit.  
in illa §.8.n.22. sic habetur: ut pruden-  
ter possit intellectus judicare illum con-  
tractum esse licitum, debet ante hoc judi-  
cium invenire motivū aliquod, quod ipsi  
hanc partem reddat magis verisimilem,  
quàm oppositam; ubi autem hoc moti-  
vum fuerit notabiliter excedens motiva  
partis contrariæ; eliciet actum iudicii  
in genere probabilium firmum, vi cuius  
prudenter opinetur dictum contractum  
esse licitum; reflectens verò supra hoc  
suum iudicium, reddi videtur omnino  
securus, & certus moraliter, quòd non  
peccet exercendo talem contractum; fa-  
cit enim hunc discursum vel formaliter  
vel virtualiter: unicuique licitum est

facere , quod post diligentem veritatis inquisitionem citra omnem passionem & culpam prudenter judicat esse secundum se licitum ob fundamenta notabiliter præeminentia omnibus , quæ in contrarium adducuntur ; sed ego hic & nunc prudenter judico, talem contractum esse secundum se licitum , quia post accuratum studium ex amore veritatis unice susceptum, pro hac parte inveni fundamenta notabiliter majora omnibus iis, quæ in contrarium mihi occurrunt : ergo hic & nunc licitum est talem contractum exercere . ita RR.P.G. videat jam DD.Perea , quàm malè referat sententiam Antiprobabilistarum , dum ait , illos judicium moraliter certum , & reflexum excludere : & si propter hoc concepit horrorem sententiæ cautiore, mutet illum in amorem ; ac conscientiæ securitatem non affectatam & temerariam illam, sed solidam , quæ à rationibus probabilioribus subministratur , sibi statuatur comparandam . & insuper noverit, Antiprobabilistas , qui judicium *firmum & non fluctuans* requirunt, ut ipse refert num. 36. imò etiam , ut vidimus, judicium reflexum certum (sive realiter, sive virtualiter distinctum, quod nunc ad rem non refert ) noverit , inquam , ipsos minimè concedere hominibus , ut

cum

cum formidine gravi ac prudenti operentur ; ut pessimè ipsis imponit nu. 37.

Sed, inquis num. 39. timendi obligationem inculcat cum Tyrso & aliis, Munieffa, dum pag. 18. ait, Probabilistarum dictamen reflexum ac certificans, esse contra illud Jobi cap. 9. ver. 28. *Verebar omnia opera mea.* & contra illud Apostoli ad Philip. cap. 2. ver. 12. *Cum metu & tremore vestram salutem operamini:* quæ verba sic exponit Munieffa, ut etiam dum bene agimus, inter spem & metum de ipsa nostra operatione agamus.

Respondeo, rectissime Munieffam hos textus, Adversariorum dictamini objicere. Illi enim hoc formant, quando apparent rationes notabiliter majores pro illicito, & quando meritò timendum est, ne incurratur culpa. ex hoc autem non sequitur, concedi & requiri à Munieffa, ut timeamus, quando adhibita debita diligentia invenimus, rem honestè à nobis fieri posse. unde quando vult, nos in ipsa operatione inter spem & metum esse, solum loquitur de metu radicali, & tali præparatione animi, ut si in oppositum aliquid probabilius & verisimilius occurreret, parati essemus, à tali actione deinceps desistere : contra quem metum radicalem, & præ-

præparationem animi, est dictamen reflexum, prout ab Adversariis adhibetur; qui per id sic obfirmant animum, ut deliberatum ipsis sit, non curare quidquam de rationibus, quantumvis in oppositum notabiliter probabilioribus, & satis clarè errorem ostendentibus, modo convincentes non sint: quæ profectò est securitas non bona, & in prædiciam culpabilem transit.

Num. 41. sic ait: dum Munieffa cum Adversariis docet, nos juxta Apostolum debere habere, dum operamur, timorem non peccandi in tali operatione, & dum aliunde docent, tunc depellendum esse timorem ut imprudentem, & ut scrupulum contemnendum; hæc tria manifestè præstant: primò, sibi contradicunt. Secundò obtrudunt Apostolum consulere timorem imprudentem, inane, & contemnendum. Tertiò exponunt homines periculo peccandi, faciunt enim, ut operentur cum timore consulto peccandi; quæ omnia absurdissima esse quis non videat? Hæc sanè cogèrent homines ad timendum, cum consulant timorem, & ad non timendum, cum timorem avertant; unde eorum conscientia inani vertigine agitata, se ipsam dilaniaret, cum maximè metu spreto sibi favere deberet. ita DD. Perea.

Sed



Sed patet solutio ex dictis : solum enim suadetur timor radicalis , vi cuius ita sit præparatus animus agentis , ut si clarior lux veritatis pro opposita parte appareret, illam amplecteretur, nec vellet minori probabilitati , in favorem carnis , contra motiva notabiliter præponderantia , pertinaciter magis & in fraudem legis, quàm piè adhærere, animo in veritatis amplexum parato.

Seçt. 5. num. 42. ad confirmandam suam doctrinam adducit textum ex S.Thoma , manifestè ex errore typi depravatum, & qui, si rectè legatur, est totus pro nobis . habet autem sic : aut ille , qui facit contra opinionem Magistrorum , utpote habendo plures præbendas, facit contra veram opinionem; & sic cum faciat contra legem Dei, non excusatur à peccato ; quamvis non faciat contra conscientiam, sic enim contra legem Dei facit : aut illa opinio non est vera, sed magis contraria, quam iste sequitur : ita quòd verè liceat habere plures Præbendas : & tunc distinguendum est , quia aut talis habet conscientiam de contrario [ id est , de eo, quòd sit illicitum ] & sic iterum peccat : *aut non habet conscientiam de contrario, sed certitudinem, sed tamen in quandam dubitationem inducitur ex contrarietate opi-*

*opinionum: & sic, si manente tali dubitatione plures praevidendas habet, periculo se committit, & sic procul dubio peccat, utpote magis amans beneficium temporale, quam propriam salutem. aut ex contrariis opinionibus in nullam dubitationem adducitur; & sic non committit se discrimini, nec peccat. ita textus S. Thom. in quo commissum ab impressoribus errorem, certum est: nam illa verba, aut non habet conscientiam de contrario, sed certitudinem, sed tamen in quandam dubitationem inducitur; nullum reddunt sensum: quid enim est, aut quomodo esse potest, non habere conscientiam de contrario, sed certitudinem, sed tamen in quandam dubitationem induci? quomodo non habet conscientiam de contrario, si habet de illo certitudinem? & quomodo habet certitudinem, si tamen in quandam dubitationem inducitur, & quidem in talem dubitationem, cum qua procul dubio peccat? in textu igitur loco seu positum est sed, qui error facile accidere solet: unde ut aliquis sensus eliciatur, sic legendum erit: aut non habet conscientiam de contrario, seu certitudinem, sed tamen in quandam &c. Sic enim aliquis sensus verborum erit: utrum pro me, jam non contendo: certè non pro Adversario.*

Da

Dato etiam , textum legendum esse, prout invenitur, nullo modo favet Adversario ; & omnino ridiculè illum sibi applicat ; recitans enim verba illa : *aut non habet conscientiam de contrario, sed certitudinem* , hanc addit parenthesin ( *ne stantibus opinionibus contrariis stare potest certitudo de non peccato* ) quæso quomodo videbimus , ibi stare certitudinem de non peccato , ubi cum certitudine stat dubitatio , qua stante , juxta Angelicum Doctorem procul dubio peccatur ? Stare vero cum prædicta certitudine dubitationem illam , contendit ipsemet DD. Perea num. 43. sic inferens : *ex quo vides, posse dari duas opiniones contrarias Magistrorum , & tamen posse discipulum vel operantem habere certitudinem de eo , quod non peccet sequendo opinionem benignam , & se conformando cum Magistris ita sentientibus : at hanc certitudinem non habet , quia videt veritatem opinionis directæ, hæc enim adhuc est dubia , & controversa inter sapientes ; nec discipulus debet præsumere, se in similibus dubiis semper invenire certam veritatem , de qua dubitant sapientiores Magistri : ergo certitudo, quam homo in eo casu habere potest , & de qua loquitur S. Thomas, est certitudo reflexa de eo, quod hic & nunc non peccet . ita DD. Perea . quis non rideat hanc illationem !*

Se-

Secundum S. Thom. ex certitudine conjuncta cum dubitatione , *procul dubio peccatur* : Secundum te habetur certitudo conjuncta cum dubitatione ; ergo [ in-  
fers tu ] habetur certitudo , cum qua se-  
cundum S. Thom. non peccatur . non sic  
DD. Perea in Logica didicimus ; con-  
traria facienda est illatio , & dicendum :  
*ergo cum certitudine , quæ hic & nunc ha-*  
*betur , procul dubio peccatur .*

Uterius ; qui certus est , quod non  
peccet formaliter , non habet dubitatio-  
nem , quod peccet formaliter , ut nu. 44.  
doces , & per se clarum est ergo S. Th.  
conjungens in posito casu certitudinem ,  
secundum te , quod non peccet formali-  
ter , cum dubitatione , quod peccet , non  
conjungit illam cum dubitatione , quod  
peccet formaliter : ergo solum illam  
conjungit cum dubitatione directa , sive ,  
quod peccet materialiter : & tamen se-  
cundum S. Th. habens certitudinem con-  
junctam cum hac dubitatione , *procul*  
*dubio peccat* : ergo S. Thom. in posito ca-  
su vel non loquitur de certitudine ,  
quam tu adstruis ; & sic frustra ipsum  
pro te adducis : vel si loquitur de tua  
certitudine , tua certitudine , utpote  
stante cum dubitatione prædicta , *procul*  
*dubio peccatur* .

Non minus ridiculum est , quod n. 45.

ex



ex illis verbis , aut ex contrariis opinionibus in nullam dubitationem adducitur , sic infert : *vides denique juxta illa verba ultima D.Thomæ , aut ex contrariis opinionibus in nullam dubitationem adducitur ; vides , inquam , hominem in conflictu duarum opinionum contrariarum de licito , licet æquè probabilium & fundatarum in motivis , & autoritate equali Magistorum , adhuc posse obtinere certitudinem , qua in nullam dubitationem inducatur , & qua videat nullum esse periculum peccandi formaliter , & verè displicendi Deo .*

Quomodo , quæso , DD.Perea , ex citatis verbis tu vides , posse hominem in conflictu duarum opinionum æquè probabilium , obtinere certitudinem , quod non peccet formaliter ; cum in conflictu opinionum æquè probabilium , aut etiam non obstante , pro altera parte , excessu , maneat secundum te num.43. illa dubitatio , cum qua , juncta certitudini , secundum S. Thomam procul dubio peccatur ? Secundum te enim manet in tali casu dubitatio directa , sive de reali honestate : *nam hæc , inquis loc. cit. adhuc dubia est , & controversa inter sapientes , nec Discipulus debet præsumere , se invenire veritatem certam ; de qua dubitant Sapientiores Magistri : atqui hac dubitatione juncta certitudini , procul dubio*

bio peccatur , secundum S. Thomam : quomodo ergo tu vides ex verbis citatis S. Thomæ , posse in conflictu *æque probabilium* opinionum obtineri certitudinem , quod non peccetur formaliter ? Subsumptum jam quidem probatum est ; probatur autem in tui gratiam etiam altera vice, sic . S. Thomas in suo casu non conjunxit certitudinem cum illa dubitatione , quæ per certitudinem excluditur : sed per certitudinem , quod non peccetur formaliter, excluditur dubitatio, quod peccetur formaliter; ergo cum sua certitudine non hanc dubitationem conjunxit , sed aliam , nempe illam, quæ est de materiali peccato : ergo cum procul dubio peccetur cum hac dubitatione secundum S. Thomam : & cum hac in conflictu opinionum *æque probabilium* maneat, etiam secundum te; obtinetur in posito casu certitudo , cum qua procul dubio peccatur . quomodo ergo tu vides in verbis citatis certitudinem, quod non peccetur ?

Quare hæc ultima verba textus S. Th. aut ex contrariis opinionibus in nullam dubitationem adducitur , rectissime à RR. P. Generali applicata sunt ad illum casum , in quo pro una parte ita præponderant rationes, ut rationes , quæ militant pro parte opposita , tanquam falsæ con-

contemnantur : pro tuo autem casu, sive in concursu *aequè probabilium* opinionum, applicari nullo modo possunt; quia habent secum illam dubitationem, cum qua procul dubio peccatur secundum S.Thomam. Vides ergo, quòd in textu S.Doctoris minimè videris, quod erat videndum.

Sect.6. num.53. ait, non minùs celebrem esse Eminentissimi Cajetani locum in Summa verbo *opinio*; ubi sic habet: eo ipso, quod operatio regulanda committitur opinioni, committitur regulæ ambiguae: quia opinio omnis ambigua est, utpote cum formidine alterius partis; & quia praesupponitur, quòd non eligatur tutior pars, consequens est, ut operatio committatur regulæ ambiguae ad casum peccati, quod constat esse illicitum. & si de peccato mortali agitur, constat esse mortale, facere scienter operationem dubiam, an sit mortalis. & hac intellige de opinione propriè dicta, quæ est cum formidine alterius partis, ut per se loquendo. non enim propterea aliquid opinione tenetur, quia diversi Doctores contraria sentiant: quoniam cum hujusmodi contrarietate stat, quòd una pars sit ratione, sufficiente ad moralem certitudinem, falsa.

Hunc textum, ait DD.Perea, à RR. P.Generali inconstanter exponi, dum eundem modò pro se adducit, modò ut erroneum late

late impugnatur , & refellit , neco minime  
dissimulando .

Tria mihi præstanda esse video . primum ostendere oportet , quàm subtiliter , & reverenter , hunc textum in meliorem partem exponat RR. P. Generalis ; vel ex hoc capite de tota Illustrissima Thomistarum Schola optimè meritus . Deinde , quàm infamem sua expositione hunc textum , & hanc doctrinam Eminentissimi Cardinalis reddat DD. Perea . Postremò , quàm manifestè totus textus sit contra DD. Perea ; & quàm manifestè sit totus pro nobis .

Ad primum igitur quod attinet , videns RR. P. Generalis , textum ex una parte clarè loqui de opinione directæ : eò quòd loquatur de opinione , cui operatio illicitè committatur , si ad casum peccati non eligatur tutior pars : hoc autem fit , si operatio committatur opinioni directæ : nam iudicio reflexo secundum Adversarios omnino licitè committitur operatio : ex altera verò parte videns RR. P. Generalis , nimium esse , requirere , ut pars , quam sequeris , fulta sit ratione sufficiente ad moralem certitudinem , rigorosè acceptam : quia sic rarissimè liceret operari , & ne quidem possemus sequi inter opiniones probabiles probabilissimam : quæ est propositio damnata : hæc , inquam ,

vi-

videns, quid fecit? ingeniosissima divisione usus, statuit, duplicem esse certitudinem moralem; unam primæ classis; qua credimus v. g. aliquando extitisse Trojam, Ciceronem fuisse Consulem: quæ sic tenemus, ut vel minimè de illis dubitare velle, insania reputaretur: alteram secundæ classis; qua, licèt non cum priore illo adhæſionis excessu, firmo tamen, & minimè vacillante assensu rem affirmatam amplectimur: quod fit, quando pro una parte habemus rationes notabiliter præponderantes: tunc enim rationibus oppositæ partis, utpote notabiliter infirmioribus, in nullam anxietatem, hæſitationem, aut ambiguitatem pendentem inducimur. De hac igitur certitudine intelligendum eminent. Cardinalem vult RR. P. Generalis. ipsumque simul & à nimio rigore, & à propositione damnata, acutè, & plausibiliter immunem præstat. Neque hunc textum, siue hanc certitudinem differt. 10. c. 3. impugnât, aut refellit RR. P. Generalis, ut oscitanter sibi imaginatur DD. Perea: cùm RR. P. Generalis, dicto c. 3. asserens, Emin. Cardinalem requirere certitudinem directam, siue speculativam, expressè referat se, & sensum Emin. Card. ad illam certitudinem secundæ classis; dum interposita parenthesis

thesi ait , requirere Emin. Card. certitudinem speculativam [ *in sensu superius exposito* ] . atqui textum secundo loco accipere secundum expositionem primo loco datam , non est , *eundem textum inconstanter exponere , & modò impugnare , ac refellere , quòd paulò ante probaveras* : ergo immerito hanc notam inurit DD. Perea RR. P. Generali . Hoc verum est , quòd RR. P. Generalis cit. c. 3. latè impugnet , & refellat limitationem illam , seu potiùs extensionem , quam in Opusculis tom. 1. tr. 31. facit Eminent. Cardinalis ; dum ait , quòd licèt non habeatur certitudo illa moralis universaliter , & speculativè , ita ut de licentia contractùs v. g. secundum se verè aliquis formidet , & ambiguus hæreat : tamen non obstante hac formidine , & hæsitatione , possit habere certitudinem illam moralem in particulari , & practicè . Sed hæ certitudines , cùm ponantur separabiles esse , & una haberi , non verò altera , utique secundum DD. Perea , qui hanc limitationem , & separationem tenet , idem non sunt : quomodo ergo RR. P. Generalis , dum priorem certitudinem laudat , & requirit , alteram verò impugnat , quomodo , inquam , per hoc amplectitur modò idem , & modò tanquam erroneum impugnat , & refellit ?

Au-

Audiamus jam , quàm bellè prædictum textum exponat DD. Perea . Premere jubet verba illa Cajetani : *hoc ipso quod operatio regulanda committitur opinioni , committitur regulæ ambiguae , quia opinio omnis ambigua est ;* ex quo [ ait Perea ] deducit Cardinalis , sic se committentem peccare . bene est , premamus prædicta verba ; sed prius sinamus illa DD. Perea premere ; quid inde eveniet ? statim patebit , ubi post DD. & nos illa presserimus . ille igitur premens , sic subsumit : *Sed opinio quamvis probabilior , adhuc est opinio ; ergo qui per illam tantum dirigitur , exponit se periculo peccandi , & peccat juxta Cajetanum ; ergo requiritur juxta Cajetanum certitudo superans opinionem , & si probabiliozem .* nunc ad imitationem D. D. premamus & nos , & sic subsumamus : *Sed opinio quamvis probabilissima , adhuc est opinio ; ergo qui per illam tantum dirigitur , exponit se periculo , & peccat juxta Cajetanum ; ergo requiritur juxta Cajetanum certitudo superans opinionem , & si probabilissimam .* Sed hoc DD. Perea damnatum est : ergo tam acutè explicas textum Emin. Cardinalis , ut clare significes , ejus doctrinam ab Ecclesia esse proscriptam . pro qua expositione debitæ tibi ab iis , quorum interest , gratiæ reddantur .

C

Nunc



Nunc ad tertium progrediamur , & videamus , quàm totus textus Eminen. Cardinalis sit pro nobis , & totus contra DD. Perea . imprimis dicit Em. Card. *si in opinione non eligatur tutior pars , consequens esse , ut operatio committatur regulæ ambiguae ad casum peccati , quod constat esse illicitum .* Subsumo : atqui DD. Perea in opinione [ etiam minus probabili , atque adeò propriè dicta , & verè ambigua , ac conjuncta cum rationabili formidine alterius partis ; *cum omnis talis ac tam infirma opinio , juxta Emin. Card. ambigua , & formidolosa sit* ] non eligit partem tutiorem , sed minus tutam : ergo consequens est , ut operationem committat regulæ ambiguae ad casum peccati , *quod constat esse illicitum* , juxta Emin. Card. ergo judicio E. C. rem manifestè ac notoriè illicitam facit DD. Perea ; non igitur hic textus pro DD. Perea , sed contra ipsum est .

Si dicat , se in casu opinionis [ propriè talis , & conjunctæ ex natura sua cum formidine alterius partis ; qualis est opinio notabiliter minus probabilis ] non committere operationem regulæ ambiguae , eò quòd superaddat judicium reflexum , non ambiguum , sed certum : hoc , inquam , si dicat , negat id , quod in suo textu E. C. affirmat . ait enim ,

ex



ex hoc , quod non eligatur tutior pars ,  
consequens esse , ut operatio committatur  
regulæ ambiguae ad casum peccati : ergo  
si hoc DD. Perea non facit ; aut esse con-  
sequens negat , aut quod consequens est ,  
non facit : quorum primum est contra-  
dicere textui , quem pro se adducit : al-  
terum est contra rationem , & consequen-  
ter illicitè agere .

Hac de opinione propriè dicta , con-  
iuncta cum ambiguitate , & formidine  
rationabili , theologica & conscientiali ,  
cùm dixisset E. C. subiungit : non pro-  
pterea aliquid tali opinione teneri , quia di-  
versi Doctores contraria sentiant ; quoniam  
cum huiusmodi contrarietate stat , quòd una  
pars sit ratione sufficiente ad moralem certi-  
tudinem fulta . Subsumo , atqui non pars  
notabiliter minùs probabilis , & habens  
rationes manifestè infirmiores , sed pars  
notabiliter probabilior , est fulta ratio-  
ne sufficiente ad moralem certitudinem ;  
illam nimirum secundæ classis , quæ con-  
sistit in assensu firmo , minimè hæsitante ,  
& conscientiam cum magna tranquilli-  
tate assecurante : ergo cùm E. C. conce-  
dat , tali iudicio rectè committi opera-  
tionem ; & cùm pro tali iudicio sola  
pars , notabiliter probabilior , sufficien-  
tes habeat rationes , non verò pars no-  
tabiliter minùs probabilis [ neque enim

dicet DD. Perea , partem notabiliter minùs probabilem , habere *ex ratione* moralem certitudinem ; aut fateri debet partem notabiliter probabiliorem , habere certitudinem vel physicam , vel moraliter maximam , adeòque juxta mentem E. C. sufficientissimam ad regulandam operationem ; cùm juxta hunc aliqua moralis certitudo sufficiat : & sic hoc ipso fatebitur DD. Perea , quòd contra mentem E. C. regulam ac distamen nostrum impugnet ] cùm , inquam , tali judicio , in nostra sententia reperto , non verò reperto in sententia minùs probabili , rectè committi operationem asserat E. C. manifestum est , quòd nostram sententiam approbet , ac teneat , adversariorum verò sententiam reprobet , ac refutet . patet ergo , quàm infelix sit in exponendis auctoritatibus DD. Perea , dum alios doctiores se , corrigere vult ; *qui est nevus minime dissimulandus* .

S. 7. prater RR. P. Generalem aggredditur Patrem Vasquez ; quòd neget , haberi posse judicium particulare certum , carens omni formidine , si judicium universale sit aliquo modo formidolosum : utitur autem tali impugnatione , quæ manifestam continet petitionem principii , sive , quæ id ipsum , quod Vasquez ostendit non adesse , etiam ipsa

ipsa requirit, & tamen adesse nullo modo ostendit. dicit enim Vasquez, quòd ad hoc, ut propositio particularis discrepet ab universali, debeat esse aliqua circumstantia & ratio, quæ fundet exceptionem in iudicio particulari. nam si universaliter verum sit, omni die Festo esse audiendum Sacrum, etiam verum erit, audiendum esse hoc, vel illo die Festo in particulari, nisi adsit quædam circumstantia & ratio hunc, vel illum diem Festum excipiens: ergo similiter, si consideratis omnibus, iudicium de licentia alicujus actionis, v. g. contractus, sit aliquo modo formidolosum, etiam iudicium de hoc præsentì & individuali contractu erit aliquo modo formidolosum. atqui [subsumit Vasquez] consideratis omnibus, & præsertim favore doctorum asserentium, iudicium universale & speculativum de licentia contractus manet aliquo modo formidolosum; ergo etiam iudicium particulare & practicum, de licentia hujus in individuo contractus, erit aliquo modo formidolosum, nisi accedat pro illo aliqua specialis ratio & circumstantia, quæ tantam de ejus licentia præbeat certitudinem, ut cum ipsa nulla formido consistere possit.

Ad hunc discursum admittit DD.

Perea, debere adesse aliquam rationem, quæ variet judicium particulare ab universali. Sed præter ea, quæ vnicè adesse posuit & ostendit P. Vasquez, nihil ostendit adesse: dicit enim n. 63. hanc rationem excusantem esse probabilitatem juxta sua principia vel æqualem, vel etiam minorem, vel juxta principia nostra, majorem: atqui hanc probabilitatem jam posuit P. Vasquez, ut concurrentem ad judicium universale: ergo cum per eam judicium universale & speculativum non reddatur immune ab omni formidine, nihil affert DD. Perea, quod posset judicium particulare facere omnino certum, & carens omni formidine: ergo sic arguit Patrem Vasquez, ut totum ejus argumentum ratum firmumque relinquat; quod est arguere, quod confutare non possis, & nolle concedere, ab aliis dictum, quod ipsissimum tu dicas: aut omnino nescire, quid dicas, vel quid neges.

Argumentum Vasquezii potentiùs promouet RR. P. Generalis, dum etiam posito, quod favor Autorum non poneretur in judicio universali, nervosè ostendit, illum, præsertim cum sit de minùs probabili, non posse assumi ad formandum judicium particulare certum. Quomodo enim, qui sine passione judi-

judicare velit , pro certo habere poterit hoc principium: *qui facit, quòd licitè fieri posse dicunt sapientes , quos videas probabilius falli in hoc suo judicio , ille prudenter & licitè facit ?* nunquid hoc principium potius falsum , quàm verum apparet ? quomodo autem , quòd potius apparet falsum , quàm verum , haberi poterit pro certo ; cum omne , quod judicatur certum , aut prius aut simul judicetur esse verum ? patet igitur , Auctores benignæ sententiæ sic premi à RR. P. Generali , ut nullatenus ostendere possint pro sua opinione , præsertim quando est de minùs probabili , minusque tuta parte , formari posse judicium practicum certum : & quia sine hoc licitè agi posse negant , patet , illos compelli , ut fateantur , ex sua opinione , saltem quando est de minùs probabili , licitè agi non posse : & quia prætereà secundum ipsos , & DD. Perea , idem est de æqualiter probabili , quod de minùs probabili ; patet universim , ex ipsorum sententia nullo modo licitè agi posse , adeoque adesse obligationem agendi secundum sententiam RR. P. Generalis . .

Sect. 8. probat DD. Perea , haberi posse judicium reflexum certum ; idque præstat in casu opinionis probabilioris . Sed nihil servit hæc probatio ad sen-

tentiam , quam tuetur DD. Perea : imò magis sententiam illam refellit . nam si certum est hoc principium : *qui facit , quod ex rationibus notabiliter præponderantibus , licitè fieri dicunt sapientes , quos ob tantam præponderantiam rationum operans meritò judicat rectè dicere , ille prudenter & licitè facit* : si , inquam , hoc principium certum est , ut sanè est : sequitur clarè , principium oppositum huic , certum non esse ; cum opposita simul certa esse non possint : sed principium probabilistarum est oppositum huic principio ; est enim illorum principium *de conformando se sapientibus , quos videas probabilius falli* : hoc verò de sapientibus , quos prudenter judicas verum dicere : ergo si propter hanc circumstantiam sapientum fit , ut aliquis certò agat laudabiliter , sublata hac circumstantia , & substituta alia contraria , auferetur certitudo laudabilitatis , & succedet vituperabilitas . potius ergo DD. Perea per hanc probationem , à RR. P. Generali acceptam , destruit suam sententiam , quàm ædificet .

Sect. 9. asserit , quòd in casu æqualis probabilitatis , formari possit iudicium prudens , & certum de licito usu talis opinionis . & notat huic asserto , refragari omnes Antiprobabilitas , ideòque  
illud



illud esse stabiendum tanquam fundamentum sententiæ benignæ.

Conatur id facere primò à posteriori : nam, inquit, quando opinio directa de licito hujus contractus est æquè probabilis, datur major autoritas pro judicio reflexo de eo quod ego sine peccato utar tali opinione. Patet hoc evidenter, nam veritatem hujus judicii reflexi defendunt omnes Probabilistæ. ergo ex æquali probabilitate directa potest nasci major probabilitas reflexa: ergo judicium certò excusans. quia juxta ipsos Antiprobabilistas major probabilitas excusat. Deinde si judicium reflexum possit ita superare opinionem directam, ut sit probabilius illa; poterit etiam superare usque ad certitudinem: ergo ex opinione utrinque æqualiter probabili poterit nasci judicium reflexum certum.

Substantia hujus argumenti, si bene assequor, in hoc consistit: certum est, me licitè eligere id, quod plerique viri docti dicunt, me licitè posse eligere: sed in concursu æqualis probabilitatis directæ, plerique viri docti dicunt, me licitè posse eligere partem mihi faventem, v.g. inire contractum: ergo certum est, me licitè eligere hic & nunc contractum: ergo ex opinionibus directis

æqualiter probabilibus nasci potest iudicium reflexum certum, & prudens, atque excusans.

Ut latens deceptio cognoscatur, applicemus hoc ipsum argumentum ad casum opinionis notabiliter minus probabilis, & notabiliter probabilioris: nam eodem modo in hoc concursu Probabilistæ discurrunt. Si ergo clarè ostenderimus, non posse in hoc concursu formari iudicium reflexum certum & prudens pro parte minus probabili, hoc ipso etiam pro altero concursu; & sic universum contra sententiam Probabilistarum, id fecerimus.

Quapropter fundamentum illud distinguo. licitè eligo, quod plerique viri docti dicunt, me licitè posse eligere, si non ostendantur, per rationes valde ponderosas, viri illi docti ab aliis viris doctis probabilius errare; & si viri illi docti non videantur exigere aliquid aut irrationabile, aut temerarium; & si insuper, quando ad modum exequendi suum consilium venit, non inter se dissideant, & ipsimet negent, sic licitum esse, quod suaderetur, conc. Si hæc adsint, ut adiunt, nego. ma. & sub eadem responsione, reliqua. Vel enim quando eligitur minus probabile relicto notabiliter probabiliore, oportet judicare,

mi-



minùs probabile re ipsa esse verum, & honestum; notabiliter probabilius autem esse falsum, & inhonestum? & hoc est irrationabile: quid enim minùs rationi conveniens, quàm veritatem adjudicare minori veritatis indicio, & negare majori? vel oportet quidem judicare, notabiliter probabilius esse honestum re ipsa, electionem tamen contrarii fore honestam formaliter, hoc est, irreprehensibilem? & hoc plus est, quàm irrationabile: quomodo enim à sano intellectu formari potest hoc complexum: *ego quidem hic & nunc libere eligo rem prohibitum & inhonestam, sed sum irreprehensibilis?* vel oportet abstrahere, an actio re ipsa sit honesta, aut inhonesta? & hoc est temerarium: quæ enim est major temeritas, in rebus conscientiae aut omnino non curare periculum materialiter peccandi, aut per rationes notabiliter præponderantes satis superque applicatum, negligere? atque in his vel concessis, vel negatis, ita inter se dissentiunt. Probabilitæ, ut alii alios refutant, & tales suasores non audiendos dicant. videt ergo DD. Perea, quòd major illa authoritas, qua se fundat, valde minuatur, si ad rem ipsam veniatur, sintque plerique illi, non tam suasores quàm dissuasores; dum proprio dis-

sensu rem faciunt magis dubiam, quàm securam.

Secundò probat DD. Perea nu. 76. certitudinem ac prudentiam judicii reflexi, ad hominem, ut existimat, efficaciter, hoc modo: per Antiprobabilitas, etsi opinio excusans contractum, sit æquè probabilis cum opposita, & consequenter licèt aliquis non possit per eos dicere, cōtractus est illicitus potius quàm licitus, aut è contra: nihilominus potest & debet reflectendo supra hunc casum dicere, cōtractus iste in hoc casu est hic & nunc illicitus, ita quidem, ut hoc judicium sit certum: ergo sicut formatur hoc judicium rigidum, certum de illicito contractu, ita ex opinione æquè probabili de licito, formari poterit aliud judicium reflexum certum de licito usu talis contractus. Urget postea num. 77. paritatem sibi evidentem, hoc modo: ideo in eo casu non possum per vos fieri reflexè certus de licito, quia æqualis illa probabilitas directà pro licito & illicito, cogit ad suspendendum judicium directum affirmans contractum esse licitum, eo quod non videtur majus motivum, & non dato majori motivo tale judicium esset imprudens: sed etiam in tali casu non datur majus motivum pro opinione directà

recta de illicito , & qui directè assereret contractum esse illicitum , potius quàm licitum , imprudenter assereret per vos , ergo si hoc non obstante formari potest iudicium certum reflexum de eo , quòd in tali casu sit illicitus contractus , ita & formari poterit iudicium reflexum benignum , & certum de eo quod sit licitus . Certè ego disparitatem non video . ita Doctor .

Non facilè legi discursum tam invalidum , quàm istum : unde miror , quomodo illum pro efficaci habere possit DD. Perea . Si enim , ut vult ad hominem , stante æquali probabilitate directæ de licito & illicito , habetur hoc ipso iudicium reflexum certum de illicito , quomodo imaginari sibi potest , quòd haberi etiam possit iudicium reflexum certum de licito ? nunquid de eodem haberi potest certitudo , quòd sit licitum , & quòd non sit licitum ? ergo ex ipsa prima certitudine sequitur exclusio secundæ : hac ergo data , & ad hominem concessa , non potest requiri secunda .

Declarabo nullitatem argumentationis in terminis , non tantum ad hominem , sed absolutè concedendis à DD. Perea . Si dubium sit , an contractus sit *formaliter* licitus , vel illicitus , hoc ipso habetur iudicium reflexum certum ,

tum, quòd illicitè fiat stante hoc dubio. poteritne DD. Perea in hoc dubio similiter formare judicium reflexum certum, quòd licitè fiat? utique non? quia cùm bonum sit ex integra causa, malum ex quolibet defectu, quamdiu manet dubiū formale, quod est malum conscientiae, tamdiu manet defectus, ex quo inferri potest, actionem esse illicitam: si ergo stante hoc defectu velis inferre, illam esse licitam, vis ex illicito inferre licitum, & ex defectu integrum: quod est contra omnem rationem. Similiter igitur, quamvis stante aequali probabilitate, rectè inferatur, illicitam fore actionem, quia fieret cum defectu alicujus requisiti, nempe judicii directi de materiali honestate, quod præcedere debet operationem: minimè tamen inferri poterit, illam licitè fieri; quia hoc inferretur ex defectu, contrario licentiae.

Quòd verò præcedere debeat judicium directum, patet: quia reflexum non est, nisi supra directum: & quia nemo potest judicare, se irreprehensibilem esse, si non judicat, honestum esse, quòd facit: & denique quia omisso directo judicio opinativo, non agit ex conscientia opinativa, de qua disputamus: quomodo enim habens solum judicium reflexum certum sive evidens,

ope-

operabitur ex conscientia opinativa ?  
ergo DD. Perea , nisi statum quaestionis  
tollere velit, debet concedere, ad licitè  
operandum ex opinione, debere præce-  
dere iudicium opinativum ; hoc igitur  
cum in casu minoris, vel æqualis pro-  
babilitatis haberi prudenter non possit,  
quid mirum , si pro certo habeatur ,  
actionem sine debito requisito factam,  
fore illicitam . & quomodo cum hac  
illatione stabit ius , similiter inferendi,  
fore licitam , hoc est, non fore defe-  
ctuosam, licet fiat cum defectu, & sine  
debito requisito ?

Si nondum capit DD. Perea , quod  
dico ; adhibeat casum æqualis probabi-  
lilitatis de eo , de quo inter arbuta se  
movente dijudicari non potest , an sit  
homo, vel fera . in hoc casu certum est,  
quod non liceat exonerare bombardam  
in illud movens . quare ? quia talis se  
exponeret periculo occidendi homi-  
nem . vel igitur etiam potest formari ju-  
dicium certum , quod licitum sit , tale  
movens percutere , vel non ? si potest ;  
ergo de eodem potest haberi certitudo,  
quod sit licitum , & quod non sit lici-  
tum : quæ est manifesta contradictio : si  
verò non possit ; ergo potest DD. Perea  
videre , quod licet ex æquali probabili-  
tate formari possit iudicium certum de  
illi-

illicito, non hoc ipso sequatur, formati eodem jure posse judicium certum de licito: quia nempe fingeret sibi aliquis securitatem ex ipso periculo, sive ex illa ratione, ex qua certus est, se non esse securum. confido itaque DD. in rem clara nunc videre disparitatem.

Illud etiam adverto, hoc judicium, quòd quando suspenditur assensus circa honestatem & licentiam, hoc ipso operatio sit illicita, non esse reflexum: est enim directissimum, & quasi primum principium ad alia judicia; ergo DD. Perea ex hoc non probat, posse ex judicio merè probabili, vel omnino suspensò, comparari judicium certum reflexum; sed solùm, quòd pro hoc casu detur secundùm Antiprobabilistas judicium, quoddam certum antecedens, ex quo tanquam aliquo primo principio inferatur actionis inhonestas, & vituperabilitas; quamvis in se fortassè honesta & laudabilis sit: quia nimirum sine debitis requisitis fit; sine quibus etiam bonum non bene fit. Sicut manifestè patet ex conscientia erronea, ex qua, si quis quod bonum est, judicet malum, & faciat, certè peccat, etsi rem de se bonam faciat, v. g. non restituat arma, malè usuro. Quapropter fallit se vehementer DD. Perea, dum ex eo, quòd de directissima

ita inhonestate alicujus contractus ob æqualitatem probabilitatis non constat, formare sibi vult judicium certum, in talibus circumstantiis contractum permitti à Deo . non enim permittit Deus, tanquam licitum , ut homo operetur sine debitis requisitis , sive , ut faciat , quod non judicat esse honestum. quando verò consideratis omnibus diligenter , judicat , honestum esse ; sicut fit in casu probabilitatis notabiliter præponderantis : tunc Deus permittit talem actionem ut licitam , & hic & nunc irreprehensibilem ; quamvis fortassis in se mala sit : quia homo fecit , quantum moraliter potuit , & elegit , quod prudenter judicavit esse bonum , licet fortè judicio falso . atque ex his cadunt omnia , quæ habet DD. Perea num. 78. & sequentibus .

Sect. 10. conatur ostendere , principium illud : *in dubiis tutior pars est eligenda* , non impedire judicium reflexum benignum . refert autem se ad sectionem quintam, ubi id clarissimè ostendit ex S. Thoma : & ad Sect. 6. ubi id ipsum manifestissimè ex Cajetano demonstraverit , clauditque numerum 88. his verbis : *lege obsecro iterum illum transcriptum sect. 6. & videbis ipsum & Navarrum hæc planè docere , & perperam*  
im-



*impugnari à RR. P. Tbyrso . Scilicet habet ex illis explicationibus , quod gloriatur DD. Perea , ut vidimus : illo acumine si stet præsens expositio , scimus satis , qualis sit .*

Postmodum num. 89. axiomatis hujus explicationem affert ex D. Antonin. 1. par. cap. 10. §. 10. ubi ait, *eligere viam tutiorem consilii esse , non præcepti : alioquin oporteret multos ingredi religionem , in qua tutius vivitur , quam in sæculo .* in quæ verba num. 90. sic Perea : Audi Antiprobabilista , qui jactas te patronum habere Antoninum ; hic dicit : *consilii est , non præcepti : Tu è converso dicis , non consilii est , sed præcepti : da ergo gloriam Deo , & confitere Antoninum non esse pro te , sed contrarium tibi in hoc puncto , imò in tota hac controversia .*

Sed quis non videt vel ex ipso exemplo , quo utitur S. Antonin. ipsum loqui de tutiori absolutè & secundum se , & quando oppositum tutiori non redditur per rationes , vel auctoritates probabilius , vel a què probabiliter illicitum , aut saltè meritò suspectum , an non sit illicitum ? utique enim per hoc , quòd tutius sit religionem ingredi , non est probabile , siue magis siue æqualiter , aut ulla ratione suspectum , quod in sæculo vivere , illicitum sit ? Nostra autem

con-

controverſia de eo tutiori eſt , cujus op-  
poſitum ſatis validè oſtenditur illicitum , aut valde ſuſpectum , an non tale ſit : ergo hæc allegatio , quam facit DD.Perea, non eſt ad rem .

Illam porro inſolentem ſuam inſultationem, non nobis tantum , ſed etiam Eximio Doctori [quem ſuum nominare ſolet , & vult præ cæteris ſumma reverentia tractari] à ſe factam eſſe noverit. nam & hic Doctor nobiſcum citat S. Antoninum pro ſententia ad probabiliora obligante . En verba ejus in 1. 2. diſ. 12. ſect. 6. num. 5. *Secunda ſententia eſt extreme contraria , ſemper eſſe præferendum id, quod probabilius eſt , minus probabili .* ita Antonin. 2. par. tit. 5. cap. 10. §. 2. hæc Suar. videt igitur DD.Perea, cui inſulter , dum exiſtimat , ſe nos ſolos criminari de immerito allegato in noſtram ſententiam S.antonino . det ergo hanc gloriam Eximio ſuo Doctori , & confeſteatur , gravioreſque teſtimonio S. Antoninum in hac controverſia eſſe pro nobis, quàm contrarium nobis.

Exinde num. 91. & 92. ait , legem , de qua æqualis utrinque ſit probabilitas , non eſſe ſufficienter promulgatam , & hominem ab ea excuſari per ignorantiam invincibilem . Sed neque hoc urget . licet enim hæc lex non ſit ſufficienter

cienter promulgata , de qua dubitatur ,  
tamen alia lex est sufficienter promul-  
gata , quæ dicit , quòd homo non debet se  
voluntariè committere periculo satis præviso  
& ostenso, materialiter peccandi, aut quando  
non potest prudenter judicare, se versari  
circa rem licitam & honestam . cum igitur  
hoc fiat per æqualitatem probabilitatis,  
in ea tutius eligendum erit : neque po-  
terit pro excusatione prætendi ignoran-  
tia : quia nemo ignorat , quòd debeat  
vitare periculum satis prævisum . neque  
suffragabitur possessio libertatis ; quia  
non est homo in possessione ad agendum  
sine prudenti judicio honestatis .

Sect. II. conatur Antiprobabilissimum  
destruere , ex eo , quòd in dubiis circa  
materiam justitiæ possit quis retinere  
rem , quam possidet . Supponit autem  
primò, esse doctrinam certissimam; quòd  
homo , qui bona fide incipit possidere  
rem aliquam ; quamvis postea superv-  
niat dubium, an sit re ipsa aliena ; pos-  
sit in tali dubio insuperabili, sibi retinere  
rem illam , & ea uti , eamve licitè con-  
sumere ut propriam : est enim in hac  
materia notissimum principium illud :  
*in dubiis melior est conditio possidentis .*  
Supponit secundò , esse apud nos prin-  
cipium fundamentale Antiprobabilissimi  
nostri , quòd quando quis dubitat , an  
sit

fit lex divina prohibens aliquam operationem , quamvis facta diligentia non possit superare tale dubium , sed potius anceps omnino maneat in prædicto invincibili dubio ; tenetur ad partem tutiorem ob reverentiam debitam legi divinæ , peccaturus illico , si oppositum faciat . Unde , inquit , si destruamus hoc principium , cum illo pariter corruet tota machina prætensi Antiprobabilismi . his positis , evidenter ruere Antiprobabilissimum , sic [ ut ait ] demonstrativè ostendit . Qui est in dubio insuperabili , an res , quam possidet , sit aliena , est etiam in dubio eodem , an detur à parte rei lex vetans retentionem illius rei : sed per Antiprobabilistas , qui est in dubio , an res quam possidet sit aliena , licitè exercet retentionem illius : ergo in dubio , an detur lex vetans retentionem , licitè exercet retentionem . Minor admittitur ab omnibus , juxta primum suppositum . Major probatur . rem quam quis possidet , esse à parte rei alienam , perinde est , ac retentionem illius esse vetitam per legem divinam sic pronuntiantem : *nihil alienum retineatur , vel sic , non retineas rem alienam ; vel sic , mihi displicet retentio rei alienæ* : & hoc manifestissimum est , inquit Perea , ac infert : ergo qui dubitat , an res , quam possi-

possidet , sit aliena ; dubitat , an retentio ejus sit vetita per legem illam pronuntiantem , *non retineas rem alienam* . ergo cum secundum omnes , etiam Antiprobabilitas , licitè possit talem rem retinere ; constat , reverentiam legis in dubio non obligare ad omittendam actionem , de cujus prohibitione dubitatur : ergo evidenter corrumpit Antiprobabilismus .

Hoc argumentum nullius prorsus est momenti , utpote pugnans secum ipso , & crassa laborans ignorantia . pugnat secum : quia tanquam doctrinam certissimam supponit , & rectè supponit ; quòd bonæ fidei possessor possit rem dubiam , ex dubio superveniente , retinere , donec sufficienter evincatur esse aliena ; adeoque quòd pro hoc casu lex illa , *non retineas alienum* , hic & nunc non obliget : quomodo igitur potest esse periculum inhonorandi legem , si certissimum sit , illam hic & nunc non obligare ? nondum videt DD. quòd casum , in quo ad reverentiam legis adstringunt Antiprobabilistæ , ne quidem attingat , & sic pugnet , quasi aërem verberans ? Crassa etiam ignorantia laborat argumentum , in quantum vult , rem alienam semper , & sine exceptione trahere obligationem restitutionis ; quod falsissimum est . nam

po-

potest aliquis esse certus, quod habeat rem alienam, & simul esse certus, quod non teneatur, vel absolutè, vel hic & nunc restituere: ut si quis habeat gladium furiosi: aut non possit sine gravissimo damno famæ rem temporalem restituere, &c. sicut igitur non sequitur: ego scio, quod hic & nunc habeam rem alienam: ergo scio, quod hic & nunc debeam restituere: ita non sequitur: ego dubito, an hic & nunc habeam rem alienam: ergo dubito, an hic & nunc eam licitè retineam. quia potest dari titulus, vi cuius eam rectissime retineam; qualis titulus, faciente Perea, secundam certissimam omnium doctrinam, est bonæ fidei possessio: ubi autem est certissima licentia actionis, ibi non est periculum inhonorandi legem, utpote pro illo casu non obligantem, nec ad illum extensam: ergo ex casu proposito, in quo nullum est periculum irreverentiæ legis, utpote non existentis pro hoc casu, nihil prorsus probatur contra Antiprobabilismum.

Itaque in forma negatur major pulcherrimi argumenti; quod scilicet, qui dubitat, an res sit aliena, hoc ipso etiam dubitet, an prohibeatur illam retinere, in casu bonæ possessionis; per quam scit, juxta certissimam omnium, etiam Perea, doctrinam, se illam licitè retinere.

&

& hanc majorem, quòd sciens, se rem certissimò licitè retinere, tamen hoc ipso dubitet, an prohibeatur retinere, à nemine probari posse existimo; nisi fortè à solo DD. Perea; ad quem proinde illam remittimus, libenter id facturum, ad subvertendum tandem Antiprobabilissimum.

Sect. 12. conatur solvere argumentum, quòd in dubiis tutior pars est eligenda. & confundit dubium cum assensu etiam probabilissimo, & maximè firmo. Unde facilè colligi potest, quàm bella sit solutio; ego, donec termini melius discernantur à Perea, eam non impugno, ne operam perdam.

Sect. 13. conatur solvere quædam alia argumenta RR. P. Generalis. quorum primum est; non posse honestè eligi opinionem, cui aliquis non possit prudenter assentiri: hoc autem reperiri in casu æqualis probabilitatis, vel notabiliter minoris probabilitatis: cum imprudens sit, aut rejicere rationes majores, tanquam falsas, assumptis minoribus, tanquam veris; aut inter æquales rationes inæquale ferre judicium. Ad hoc dupliciter respondet DD. Primò, posse dari rationabilem causam, ut quis in tali casu se flectat ad judicandum id, quod minùs verisimile apparebat; v.g. bo-



bonum spirituale, aut temporale proximi, aut aliquid simile. Sed hoc non est respondere ad argumentum, quod hæc omnia jam comprehendit; cum dicat, si consideratis diligenter omnibus circumstantiis appareat æquè aut minùs probabiliter licitum: si ergo rationabilis causa, aut bonum proximi aliud exigat, non jam æquè aut minùs probabiliter est licitum; sed vel certò, vel probabilius: sicut quòd reconvalescens, ob periculum reincidentiæ, non teneatur die festo adire templum ad audiendum sacrum &c. Secundò respondet ex S.Th. 2.2. quæst. 60. art.4. ubi docet, dubia esse in meliorem partem interpretanda: adeòque posse in favorem inclinari iudicium intellectus, etiamsi nulla pro illa parte præponderet ratio. verba S.Doct. hæc sunt: dicendum, quòd potest contingere, quòd ille, qui in meliorem partem interpretatur, frequentius fallatur: sed melius est, quòd aliquis frequenter fallatur habens bonam opinionem de aliquo malo homine, quàm quòd rarius fallatur habens malam opinionem de aliquo bono; quia ex hoc fit injuria alicui: & hinc potius tendere debemus ad hoc, quòd hominem iudicemus bonum, nisi manifesta ratio in contrarium appareat. hic est aureus textus

D

tus

tus D. Thomæ ; sed ne apex quidem illius favet DD. Perea . Quæro enim, an licitum sit, vel an probabile sit, licitum esse, malum de homine judicare, quando non habetur manifesta ratio de malitia? si licitum est: ergo licitum est, facere injuriam proximo: ait enim, Sanctus Doctor ex tali judicio *injuriam fieri alicui*. Si non est licitum, neque probabile, quòd sit licitum? quomodo igitur ex hoc textu, nec de licentia, nec de probabilitate licentiæ loquente, ostendit DD. Perea, posse in concursu æqualis, vel minoris probabilitatis de licentia, hominem judicare & agere secundum quam voluerit partem, etiam minus probabilem? observet igitur DD. Perea, rationes probabiliores de malitia hominis esse purè speculativas; ex quibus non possit inferri licentia & judicium practicum: sicut ex rationibus, quòd probabilius hæc vel illa materia sit sufficiens ad Sacramentum, non hoc ipso inferri potest, licitum esse, in tali materia administrare Sacramentum: nam rationes, que pugnant pro valore, non hoc ipso pugnant pro licentia: quid ergo mirum, si in casu, in quo non adsunt rationes pugnantes pro licentia, non possit judicium formari de licentia, sed potius debeat formari contra-

tra illam ? argumentum autem RR. P. Generalis procedit de casu, in quo sunt rationes de licito, & illicito ; de quo proinde secundum allegata & probata formandum erit iudicium : quia si ad rationes non respiciatur, hoc ipso iudicium non erit prudens, sed potius temerarium . Si verò ad rationes respiciatur, petit argumentum, an prudens sit iudicium, si rationibus æqualibus tribuantur inæqualia, vel notabiliter præponderantibus tribuatur minus? ad hoc autem quid respondet DD. Perea? posse iudicari contra licentiam, quando nulla adest ratio pro licentia, sive, posse iudicari contra rationes speculativas probabiliiores, quando habetur certitudo de illicito . hoc scilicet est rem acu tangere .

Secundum argumentum RR. P. Generalis, quod hic conatur dissolvere DD. est hoc : quando homo est dubius, an hæc actio sit bona, vel mala, & illam elicit, peccat juxta omnes : at supponimus, illum manere dubium circa licitum vel illicitum actionis ; ergo peccat illam eliciendo . Respondet DD. distinguendo majorem : quando est dubius speculative, nego . practice, conc. maj. tunc autem practice non est dubius, quando, licet de ipsa materiali

honestate actionis secundum se dubitet, minimè tamen timet, aut existimat se reprehensibilem esse: non autem timet in tali casu, nec existimat se reprehensibilem esse, *quia sequitur prudentes, aut quia non satis est ipsi applicata lex vetans*; tales autem non reprehensibiles, sed potius laudabiles sunt.

Ad hoc responsum confutandum, utar casu *minùs probabilis*, & *notabiliter probabilioris*, claritatis causa, ut nullitas responsi manifestius appareat; quo habito, idem iudicium formandum erit de casu æqualis probabilitatis: nam juxta ipsos Adversarios est eadem de utroque ratio. pono autem (ut gratiam apud DD. Perea ineam) sententiam Antiprobabilistarum esse notabiliter minùs probabilem sententia Probabilistarum. jam sic: qui sequitur prudentes; quamvis notabiliter minùs probabiliter dicentes, non est reprehensibilis, sed potius laudabilis: sed qui obligat homines ad sectanda in praxi probabiliora, sequitur prudentes, quamvis notabiliter minùs probabiliter dicentes: ergo si DD. Perea obliget homines ad sectandam in praxi doctrinam Antiprobabilistarum, non erit reprehensibilis, sed potius laudabilis: atqui DD. Perea sect. 20. num. 205. dicit, sententiam Antipro-

tiprobabilistarum *in praxi esse valde periculofum* ; ergo fi DD.Perea in praxi fequatur , & obliget alios ad fequendam , *in praxi valde periculofam fententiam* , non erit reprehenfibilis , fed potiùs laudabilis . Non placet hic modus difcurrendi , defumptus ex principio reflexo tantopere appretiato à Probabiliftis ? quare non ? quia DD.Perea eft dubius de fententia Antiprobabilistarum obligante , utpote notabiliter minùs probabili . Sed quid hoc obftat ; macte animis DD.confidenter age , es dubius fpeculativè , fed habens reflexionem , cujus beneficio non fis dubius practicè . itaque feftare laudem tuæ fententiæ , & elige fecurus minùs probabile , hoc eft , oblige te , & alios ad fententiam Antiprobabilistarum , & ad doctrinam , *in praxi valde periculofam* . Quòd fi exiftimas , cum tali dubio fpeculativo , neceffariò etiam conjunctum effe dubium practicum ; fcias velim , hoc ipfum effe , quod nervofiffimè probat argumentum RR.P.Generalis , cui imperceptibile eft , poffe hominem fibi perfuadere , fe irreprehenfibilem effe in cafu , in quo fequitur illos , quos ex rationibus notabiliter præponderantibus , judicat errare & fuadere , quod minimè fuadendum effet : aut poffe ibi prætereudere infufficientiam

applicationis , ubi pars una tam clarè ostenditur , ut altera prudenter non possit recipi per assensum directum &c.

Sect. 14. conatur ostendere , quòd ex reverentia legi debita, ex qua Antiprobabilistæ volunt abstinendum esse à contractu v.g. de quo dubitatur , an licitus sit : quod, inquam, ex hac ipsa reverentia inferri possit , contractum esse licitum , & ineundum . argumentatur sic : Ego reflectens supra casum dubii de contractu , non debeo ex præcepto præsumere illum contractum mihi esse illicitum : ergo nec illicitus est in eo casu ; quia quod non teneor habere pro illicito, possum habere pro licito. antec. probatur : quando una præsumptio est æquè periculosa, ac alia , seu æquè alterativa legis Divinæ directæ existentis in Deo, non potius teneor ad unam præsumptionem , quàm ad aliam : sed præsumptio de eo, quòd contractus sit tunc illicitus, est æquè periculosa , & alterativa legis Divinæ directæ existentis in Deo circa contractum illum : nam cum dubius sim, an lex Divina directa re ipsa prohibeat, vel non prohibeat contractum : ego per primam præsumptionem rigidam, & per secundam benignam me expono æquali periculo , nempe alterandi legem Divinam directam, & per se ; nempe vel facien-



ciendo illicitum contractum , qui mihi  
secundum Divinam legem per se erat  
licitus ; vel è converso faciendo licitum  
eum , qui juxta legem Dei per se erat  
illicitus : quorum utrumque est alterare  
legem Divinam directam , & per se :  
ergo ego reflectens supra illum casum  
dubii de contractu , non debeo potius  
præsumere illum contractum esse illicitum ;  
atque adeò licitè possum præsumere  
oppositum , & consequenter absque  
peccato contrahere . ita DD. Perea ,  
pro clausula addens : *hoc sanè argumento  
convincor .*

Transferamus convincens hoc argumentum , in dubium de valore Sacramenti , & dicamus sic : in dubio de valore Sacramenti , non debeo ex præcepto præsumere , Sacramentum esse invalidum : nam hæc præsumptio esset æquè periculosa alterandi [ hoc est , aliter concipiendi , quam in re sit ] cognitionem Divinam directam , quam Deus habet de valore , vel non valore Sacramenti ; ac esset præsumptio , qua præsumerem Sacramentum esse validum : ergo non debeo ex præcepto potius præsumere , fieri irreverentiam Sacramento , si in tali materia administratur ; quam possim præsumere , nullam fieri irreverentiam : atqui licitum est administrare :



Sacramentum in materia, ubi nulla præsumi potest irreverentia : nam solum periculum irreverentiæ hætenus præstitit talem administrationem illicitam, juxta omnes: ergo in materia dubia poterit DD. Perea administrare Sacramentum : atqui hæc propositio damnata est: ergo vi sui argumenti, quo dicit se sanè convinci, poterit DD. Perea licitè ac laudabiliter facere, quæ sunt prohibita ab Ecclesia. Videt, credo, DD. quali argumento fateatur se convictum: quali icilicet nemo alius ex orthodoxis unquam fatebitur, aut fateri possit, se convinci, aut leviter moveri.

Unde hic error DD. processit? quia confundit periculum irreverentiæ cum periculo alterandi [hoc est, aliter concipiendi, quàm fortè in mente Dei sit] legem Divinam: quæ duo sunt diversissima. nam periculum alterandi nullam affert irreverentiam: aliàs nemo citra irreverentiam posset se excitare ad spem gloriæ cælestis: fortè enim de eo non gloria cælestis, sed poena æterna existit in mente Dei. periculum verò faciendi actum, fortè à lege Divina prohibitum, affert irreverentiam: quia materiales transgressiones non vitare, quando moraliter vitari possunt, est quasi quidam materialis contemptus legis: vel fateri debe-

debebit DD. Perea non esse irreverentiam erga Sacramenta, si passim exponantur periculo invalidationis. posse autem in nostro casu materiales transgressiones evitari, clarum est. qui enim dubitat, an hic & nunc detur lex jejunii, potest jejunare, & sic evitabit omne periculum: nam in jejunio non est periculum transgrediendi legem jejunii, siue detur, siue non detur.

Sect. 15. quærit, an argumento ex obedientia desumpto satisfaciant Antiprobabilistæ; & sect. 16. ac 17. illorum responsiones impugnat.

Ego non capio, quomodo possint nobis Adversarii opponere, quod obedientiam destruamus. vel enim est probabilius, quod subditus in casu rei dubiæ teneatur obedire, vel est minus probabile, ita ut oppositum sit probabilius? si probabilius est, quod teneatur obedire: ergo nostra sententia obligat ad obediendum; quia nos obligamus ad probabiliora. Si autem est minus probabile, quod teneatur obedire, ita ut oppositum sit probabilius: ergo non obedire erit consilii, quamvis non sit præcepti. admittunt enim Adversarii, & expressè DD. Perea num. 90. sententiam nostram esse consilii: atqui non solvit legem, qui adstruit consilium: ergo.

Occasionem hujus tam insuspicabilis impugnationis dedit, quòd requiramus, ut judicetur re ipsa esse honestum; quod agendum est: hoc autem fieri non posse, si rationes pro inhonestate notabiliter præponderent, aut sint æquales: ergo in casu, quòd superior rem aliquam ex rationibus notabiliter minoribus, aut æqualibus præcipiat, obedire non poterimus.

Hoc argumentum procedit ex falso supposito: quòd nimirum requiramus, ut judicium de honestate rei solùm feratur ex rationibus intrinsecis, & sumptis ex ipsius rei principiis; non verò etiam ex rationibus extrinsecis, quæ sumuntur ex circumstantiis, rem hic & nunc afficientibus, quod non ita est: dicimus enim, hominem non posse licitè facere, nisi quod perpensis diligenter omnibus, prudenter potest judicare honestum ac licitum, prout substat præsentibus circumstantiis: atquæ inter circumstantias in præsentì casu obedientiæ, est etiam voluntas superioris; cui circumstantiæ plurimum tribuitur, juxta illud Christi: *qui vos audit, me audit*; & juxta alia principia ascetica: ergo per hanc circumstantiam plurimum momenti accedit, ut res, prout hic & nunc facienda est, ut substans huic circumstantiæ, judicetur.

cetur longè probabilius honesta , quàm inhonesta : quamvis si solùm considerentur rationes ejus propriæ , talis non judicaretur . Sicut si contractum venditionis , in quo supra justum plusquàm dimidium exigitur , secundùm se consideremus , injustum illum reputabimus : sed si consideretur cum hac circumstantia , quòd Petrus aliter non obtineat à Paulo rem suam injustè ab eo detentam , censebitur contractus hic & nunc justus , propter licitam compensationem : sic se habet res in nostro casu : nihil ergo prorsus ex nostra sententia periculi accersitur obedientiæ .

Libenter verò viderem , quomodo eam Adversarii non eliminant ex claustris ; dum docent , licitum esse sequi opinionem minùs probabilem : & esse opinionem talem , quæ dicat , in casu dubii licitum esse non obedire . vel igitur fateri coguntur , aut non esse licitum sequi minùs probabilia , hoc est , suam sententiam , qua hanc thesin propugnant : aut licitum esse non obedire in casu frequentissimo , adeoque valde raram esse obedientiæ obligationem : vel inter se altercari debebunt , an Auctores ipsorum [quos bene scit DD. Perea , ut non sit necesse , eos à me nominari] probabiliter dixerint , esse opinionem

probabilem, quæ doceat, in casibus dubii de honestate rei præceptæ, licitum esse non obedire. ex qua altercatione, si nihil aliud, saltèm id commodi nobis accedet, quòd interim à calumniosis oppugnationibus, quibus in his sectionibus valde excessit DD. Perea, simus futuri immunes.

Sect. 18. proponit communem rationem, qua solet opinio nimis benigna probari. nempe quòd operans prudenter, non peccet: & operetur prudenter, sequens opinionem probabilem; ergo.

In hac ratione refellenda, insigniter falli ait RR. P. Thyrsus, dum docet, in casu quo una pars alicui est notabiliter probabilior, partem oppositam eidem non esse probabilem. quasi verò contrarium non manifestè constaret ab experimento; cùm videamus sapientissimos suam pronuntiare sententiam, dicendo simul, oppositam esse probabilem; imò ut hoc dicant, quando ita ipsis apparet, moneri Jesuitas in libro de ratione studiorum: esse igitur hoc dogma RR. Generalis novum omnino, & contra se, & omnem suam Societatem, imò & contra omnes omnino Theologos. atque futurum aliàs, ut quandocumque aliquis in moralibus subscribit suæ opinioni, diceret omnes oppositas esse sibi impro-

improbabiles: quod esset valde temerarium, & injuriosum.

Hæc , & plura alia , quæ congerit DD. Perea , non tangunt doctrinam RR. P. Generalis , & præcisè ex eo oriuntur, quòd impugnans , soliditatem & constantiam tanti viri in docendo, non assequatur. RR.P.Generalis , respiciens ad statum præsentis controversiæ, qui est , an & quando *ex conscientia probabili ac opinativa* operari possimus, docet, illi, qui unam partem ob rationes notabiliter excedentes recipit , eamque assensu firmo probat, ac opinatur; ei partem oppositam , stante hoc assensu non esse probabilem; *in ordine scilicet ad agendum secundum illam ex conscientia probabili, seu opinativa.* & hoc , apprehensis terminis, evidens est. quia opposita simul opinari nō possumus: Si ergo partem notabiliter verosimiliorem aliquis opinetur , non poterit simul , stante hoc opinandi actu, opinari oppositum : qui autē non opinatur oppositum, non potest illud, dum non opinatur , ex conscientia opinativa seu probabili operari: quomodo enim operabitur ex conscientia tali, si conscientiam talem non habeat? ergo evidens est, quòd illi, qui partem verosimiliorem recipit, & opinatur, non possit, stante hoc assensu opinativo , pars op-

posita esse probabilis , *in ordine ad agendum hic & nunc ex conscientia probabili seu opinativa* : ergo non tantum non contra suam Societatem , & omnes Theologos ; sed purissimam , & à nemine negabilem veritatem dicit RR. P. Thyrsus , dum ait , recipienti partem verosimiliorem , oppositam non esse probabilem : neque ipse in hoc insigniter fallitur ; sed DD. Perea non attendit ea quæ dicuntur , ad subjectam materiam , hoc est , ad statum quæstionis dici , ut mos est doctorum virorum .

Atque sic , si totum demus DD. quod vult , quid habebit , ad præsentem controversiam , de licentia operandi ex conscientia probabili , pertineus ? Sit , quod opinanti hanc partem , probabilis maneat opposita : num vi hujus probabilitatis manentis , poterit , stante opinione de altera parte , *ex conscientia probabili* , de qua hic loquimur , operari partem oppositam ? certè non ; quia sic deberet partem hanc opinari ; quod fieri non potest , stante opinione de altera parte : ergo , si operari possit partem oppositam in his circumstantiis , solum poterit illam operari ex conscientia certa , aut evidenti : de hac autem conscientia in præsentem non quæritur : ergo concesso toto , quod vult DD. Perea ,



rea, nihil agit laboriosissimus luctator, quod ad præsentem controversiam pertineat.

An vero ex solo iudicio probabilitatis, conjuncto cum iudicio alterius partis, quod dicat, hanc probabilitatem fucum esse, & præter apparentiam habere nihil, prudenter aliquis, & inculpabiliter operari possit, huc non pertinet examinare. Satis est, ostendisse, eo dato, nihil haberi, ad præsens pertinens; adeoque doctrinam RR. P. Generalis, præsentì quæstioni accommodatam, stare inconcussam, & DD. omnino extra orbem misisse suam sagittam.

Est & alius sensus, in quo accipi potest hoc dictum, *quod opinanti partem notabiliter præponderantem, pars opposita non sit probabilis*: hoc est, quod prudenter illam approbare, & assensu opinativo, firmo ac minimè fluctuante, recipere non possit. & hic sensus etiam intenditur à RR. P. Generali. & quamvis non sit tam certus, quàm prior, qui omnino est evidens; tamen est valde rationabilis: cum planè contra rationem esse videatur, firmiter affirmare id, pro quo affirmando sunt rationes notabiliter infirmiores, & negare id [quod necessario ad priorem affirmationem consequitur, cum ex oppositis non possit simul

affirmari utrumque] pro quo affirmando sunt rationes notabiliter firmiores : hoc enim non tam rationis , quàm nimix libertatis videtur esse .

Restare potest tertius sensus , ut dicere , *opinanti partem notabiliter præponderantem , oppositam non esse probabilem* , idem sit , ac dicere , partem oppositam omnino enervari , ejus rationes prorsus evanescere , ac nullam ingeniosæ inventionis æstimationem retinere . Et hunc sensum nec RR. P. Generalis , nec alii Antiprobabilistæ intendunt .

Itaque potest *probabile* dividi in , *probabile simpliciter* , & in *probabile secundum quid* : istud est , quod habet tantam apparentiam , quanta solet sufficere ad assensum , absolutè dictum , & simplicem , quamvis non sufficiat ad assensum refutativum alterius partis . *probabile simpliciter* est , quod sufficit ad assensum , etiam refutativum alterius partis , & tale *probabile* est illud , quod habet rationes notabiliter præponderantes . & istud *probabile* ulterius dividi potest , in *probabile in actu exercito* , sive in *actu secundo* : & in *probabile in actu signato* , sive in *actu primo* . *probabile simpliciter* , in *actu exercito* est , quod actu opinamur præ altero . in  
actu

actu signato : quod prudenter possumus opinari præ altero . Quando igitur dicitur , opinanti partem notabiliter præponderantem , non esse probabilem partem oppositam , non excluditur , quòd non sit probabilis secundum quid ; sed quòd non sit probabilis simpliciter : idque tam in actu exercito : quod evidens est , cum non possint stare oppositi assensus : quàm in actu signato : quod valde rationabile est : cum non videatur , prudenter posse hominem opinari id , quod habet rationes notabiliter infirmiores , contra id , quod habet rationes notabiliter firmiores .

Et quæ in comparatione notabiliter præponderantium rationum ad rationes notabiliter inferiores dicta sunt , proportionaliter intelligi debent de concursu rationum æqualium . nam in sensu explicato , neutrae probabiles sunt simpliciter ; cum non sufficiant ad assensum victoriosum & refutativum : quamvis sint probabiles secundum quid , hoc est , satis magnæ , & sufficientes ad assensum absolutum ac simplicem . Ex quo etiam patet , per hoc , quòd opposita pars dicatur non esse probabilis in nostro casu , non dici , rationes pro illa non esse magnas , aut graves absolutè , & secundum se : quia possunt utrinque  
val-

valde graves rationes concurrere , quæ propter æqualitatem tamen non erunt probabiles in sensu explicato, licet gravitatem habeant notabilem . est ergo sensus, non esse probabiles, hoc est, non esse graves ad prævalendum , quamvis simpliciter graves sint . Per hac patet etiam responsio ad impugnationem , quæ sect. 19. proponitur , & laborat eadem ignorantia .

Sect. 20. proponit argumentum reflexum , quod fieri solet pro opinione , ut vocant, benigna . & est hoc : per Antiprobabilistas licitum est sequi opinionem probabiliorē , saltem his, quibus probabilior videtur : sed nobis post diligens examen videtur probabilius , contractum in casu opinionis illum , probabiliter excusantis, esse practicè licitum ; ergo debent Antiprobabilistæ fateri, nobis, Probabilistis, licitum esse .

Hoc argumentum reflexum , quo maximè triumphant Probabilistæ , maximè pugnat contra illos, & omnem eis modum eripit , nos impugnandi . contra illos quidem pugnat ; quia si licitum sumatur Antiprobabilisticum , quod est conjunctum cum obligatione , & quod sumi debet , si volunt propositionem primam ab Antiprobabilistis sumere ; tunc tale erit ipsorum argumentum : per

An-

Antiprobabilistas *licitum* est , & debitum, in casu legis violandæ , sequi opinionem probabiliorē , saltē his, quibus probabilior videtur : sed Probabilistis post diligens examen videtur probabilius , contractum in casu opinionis illum probabiliter excusantis , esse practicē licitum ; ergo Antiprobabilistæ fateri debent , Probabilistis hoc , quod est probabilius, *esse licitum*, & debitum; id est, *debere illos sequi probabiliora* : atqui hoc libenter fatentur Antiprobabilistæ : pro hoc enim unicē pugnant : & hoc nullo modo fateri volunt Probabilistæ : nam esse contra omnes totius hujus ac prioris sæculi Theologos , & asserre onus intolerabile , inventionemque ac propaginem esse Jansenisticam, usque ad raudinem , maximè per DD. Peream , clamant : ergo hoc argumentum , si in forma positum est , & non habet quatuor terminos [ quod DD. Perea recognoscendum relinquo, ubi sua dictata philosophica pro typo reviderit ] maximè pugnat contra Probabilistas , illosque ad nostras partes , dum minimè volunt , compellit .

Quòd verò omnem eis modum , nos impugnandi, eripiat, non minùs clarum est, si enim , quod impugnando maximè contendunt , *licitum* est sequi minùs pro-

probabilia : cū nostra sententia sit minus probabilis , secundum ipsos , ut fiet per argumentum istud reflexum , in hos terminos translatum , ut nostram sententiam quilibet licitè ac laudabiliter sequatur : ergo Probabilistæ vel esse debebunt impugnatores eorum , quæ laudabiliter fiunt : vel per eorum argumentum reflexum omnis eis modus , nos impugnandi eripitur .

Directam responsionem ad hoc argumentum non addo ; cū accommodatum satis sit ad rigorem Scholasticum , reflexum reflexo solvere . Si quis tamen aliud exigat , videre poterit in Opusculo meo objectionem quartam .

Addit DD. Perea num. 205. sententiam nostram valde periculosam esse in praxi , propter hoc , quòd respuat omnem reflexionem supra statum opinionis speculativæ utrinque probabilis : sic enim non posse operantem esse certum de honestate suæ actionis ; adeoque semper se exponere periculo formalis peccati , & per consequens peccare . verba illius num. 206. hæc sunt . iudicium opinativum probabilius de eo quòd contractus non sit usurarius , & peccaminosus , non facit intellectum certum de eo quod non sit usurarius , & peccaminosus in se , & hic , & nunc : sed efficere id,

id , de quo incertum mihi est , seu certum non est , an sit peccatum , jam est peccare ; ergo . Majorem probat : quia stultus foret , qui diceret : ego probabilius affirmo contractum in se habere talia intrinseca prædicata ; ergo sum certus de ea veritate : affirmaret enim judicium opinativum , & indifferens ad veritatem & falsitatem , non esse opinativum , & indifferens ad falsitatem , sed determinatum ad veritatem .

Cum adeò amet reflexiones DD. Perea , miror , quòd non etiam fecerit aliquam de hoc , quòd argumentum suum , si quid probet , eodem modo probet , periculosum in praxi esse , sequi opinionem probabilissimam : sicut enim judicium opinativum probabilius non facit certum de veritate rei ; sic neque judicium opinativum probabilissimum : stultus enim foret qui diceret : ego probabilissimè affirmo contractum habere talia prædicata intrinseca ; ergo sum certus de rei veritate : certitudine nimirum strictè dicta , de qua loquitur DD. sic enim affirmaret , judicium opinativum , & indifferens ad veritatem vel falsitatem , non esse opinativum , nec indifferens . ergo juxta argumentum DD. Perea , periculosum in praxi erit , sequi opinionem probabilissimam ; ergo juxta DD.



DD. Perea Summus Pontifex præscripsit nobis doctrinam, in praxi valde periculofam. parcus ista DD.

Præterea, non vides, quòd tuum argumentum perinde premar tuum iudicium reflexum? nam ponamus opinionem affirmantem inhonestatem actionis, esse notabiliter probabiliorem, & oppositam esse notabiliter minus probabilem. jam tu te reflectes in hanc opinionem notabiliter minus probabilem, dicesque, esse opinionem minus probabilem, te hic & nunc non peccare: num igitur ex hoc certus eris, te hic & nunc non peccare? nunquid cum stulto diceres: *ego video reflexè* [ per iudicium nempe illud, quo in opinionem minus probabiliter excusantem, oculum mentis re-torques ] *minus probabile esse, quòd hic & nunc non peccem: ergo certus sum de rei veritate, quòd hic & nunc non peccem, & sim coram Deo excusatus?* nunquid sic ex iudicio opinativo excusante, ut reflexè cognito, & propterea, quia opinativum est, indifferente ad veritatem vel falsitatem, inferres certitudinem veritatis, hoc est, diceres, certam esse tuam irreprehensibilitatem, quia reflexè cognosceres eam esse incertam: ut igitur certa tibi fiat tua irreprehensibilitas, debebis supra aliud, quàm supra minus, vel  
æqua-

æqualiter probabilem opinionem Doctorum te reflectere. Denique nullo modo verum est, quòd nos omnem reflexionem, supra probabilem opinionem respiciamus : cujus contrarium jam supra ex disertissimis verbis RR.P. Generalis ostendimus : sed solum negamus, illam reflexionem posse operanti servire ad excusationem coram Deo, quæ sit in opinionem, quam aliquis judicat fallere, aut nò potest prudenter judicare, non malè dirigere : quàm enim hoc ridiculum : *ego me reflectebam, quòd iste Doctor probabilius falleretur, & me falleret : ergo certum est, me esse irreprehensibilem, quòd eum sim secutus !* nos verò facile concludimus nostram irreprehensibilitatem, hoc modo : secutus sum eum, quem re bene considerata vidi probabiliora suadentem : ergo cum majorem notitiam hic & nunc comparare mihi moraliter non potuerim, sum hic & nunc irreprehensibilis. ecce quanta distantia nostræ reflexionis à reflexione Probabilistarum : quàm, conveniens nostra lumini naturali ; quàm verò eidem adversa DD. Perea !

Sect. 21. impugnatur Patrem Muniessa, quòd dicat, licitum hoc ipso esse homini contractum facere, quòd prudenter judicet, illum sibi esse licitum. assert autem ad hoc refellendum exempla de

va-

valore , ex quo licet prudenter judicato , non hoc ipso licite proceditur ad operandum . verba ejus sunt : Parochus ex motivo sibi probabiliori , adeoque prudenter , judicat valere Baptismum *in nomine Genitoris* , vel sub alia forma , aut materia sibi probabilius valida ; & tamen illud judicium vincens prudenter formidinem de opposito , non sufficit , ut baptizet sub illa forma . hoc ipsum patet etiam in Medico , qui probabilius , prudenterque judicat , hoc remedium profuturum , & licet prudenter vincat formidinem contra hunc assensum ; tamen imprudens esset applicando illud remedium relicto certo . ita DD. nihil contra Muniessam , qui non dicit , à judicio *valoris* , sed à judicio *licentie* rectè procedi ad licentiam . quàm ignava igitur est hæc impugnatio !

Seçt. 22. circa eandem rem impugnat RR. P. Generalem , & affert num. 222. eadem exempla : unde eandem æstimationem meretur hæc oppugnatio , quam prior . Contendit etiam , non posse formari judicium practicum certum , & absque formidine peccati , ex rationibus merè probabilioribus , nisi beneficio judicij reflexi . Si loquitur DD. Perea de judicio certo circa materiale honestatem , verum est , id non posse formari

mari ex rationibus merè probabilibus: & hoc ne quidem beneficio iudicii reflexi, quod juxta ipsum etiam DD. non materiale, sed formalem honestatem adstruit. Si verò loquitur de iudicio practico circa formalem honestatem, siue circa irreprehensibilitatem, negamus, illud non posse haberi immediatè ex rationibus probabilioribus, & dicimus, ex hac: *diligenter consideratis omnibus, hoc est probabilius honestum*, posse statim, directè, ac sine ulla extrinseca reflexione, inferri hanc: *ergo ego hic & nunc hoc faciens sum irreprehensibilis*; quæ est dictamen directum, ex præmissa convenienti diligentia comparatum, & in actu exercito certificans de se ipso: quæ certificatio signate, & expressè probatur per hoc principium morale: qui facit, quod perpensis diligenter omnibus, probabilius invenit licitum, laudabiliter agit: sed ego hoc facio; ergo laudabiliter id facio; quo principio non tribuitur certitudo, sed dari, & dictamini directo inesse ostenditur: ergo certitudo dictaminis habetur sine iudicio illo Adversariorum extrinsecè reflexo. Si autem hanc ipsam probationem velint vocare dictamen reflexum, non obstitimus: satis enim nobis est, nos certitudinem habere, siue dein directæ sit, siue reflexæ.

reflexa : cū Adversarii nec directam habeant , ut fatentur , nec reflexam : quomodo enim , quando vident , consideratis diligenter omnibus , minùs probabiliter honestum , & probabilius esse inhonestum , quod faciunt , poterunt facere reflexionem , se certò irreprehensibiliter agere , hoc est , esse laudabiles , dum vel rationes , vel Doctores , quos judicant falli , & fallere , sequuntur ?

Sect. 23. conatur solvere quasdam objectiunculas mediocres , & solvit illas mediocriter , mixtis hinc inde suis erroribus ; quos non amplius referimus : neque putamus , ex aliquali ad minora responsione multum accedere illi , qui ad fundamenta principalia dicere solidi nil possit .

Sect. 24. ponit , opinionem benignam ex praxi Summorum Pontificum apprimè confirmari . Illi enim , inquit , dispensarunt in voto solemni castitatis ; item in matrimonio rato : quamvis aut æque probabile , aut probabilius sit , ipsos dispensare non posse . Respondeo , per hoc argumentum valde sibi præjudicare DD. Perea , & nostram sententiam potius stabilire , quàm labe-  
factare , non enim dicet DD. Perea , Summos Pontifices , quando aliquid faciunt , præsertim in rebus gravissimis ,  
nihil

nihil curare de veritate , an res , quam faciunt , re ipsa honesta sit , vel non ? ergo admittere debet , Summos Pontifices in prædictis casibus judicasse , se re ipsa & verè habere potestatem dispensandi ; atqui non potuerunt hoc prudenter judicare , secundum DD. Perea , si non fuit ipsis probabilius , se illam potestatem habere : ergo si dispensarunt , judicantes prudenter , se id probabilius facere posse re ipsa , processerunt in illis dispensationibus secundum probabiliora , non secundum minùs aut æqualiter probabilia , adeòque secundum nostram , non secundum DD. sententiam . Minor , quòd secundum DD. Perea , non potuerint sic prudenter judicare , si non fuit ipsis probabilius , sumitur ex ipso DD. Perea , qui sect. 13. num. 127. sic ait : *concedimus , intellectum nec physicè , nec moraliter , hoc est prudenter , posse assentiri parti æquè , aut minùs probabili : & consequenter non posse assentiri uni ex dictis opinionibus speculativis de licito , vel illicito contractus secundum se* : dicamus pro casu præsentis dispensationis secundum se : ergo Summi Pontifices in his dispensationibus ex nostra sententia , hoc est , ex probabiliiori sibi honestate materiali processerunt : ergo DD. Perea , si probat , pro nobis probat , & contra se .

De-

Deinde transit iterum DD. Perea de dubio valoris ad dubium de licentia. utrum enim Pontifex dispensare possit, ad quæstionem de valore pertinet: ex majori verò probabilitate de valore, non statim rectè proceditur ad licentiam; quia quod est probabilius validum, potest esse minùs probabiliter, aut ne probabiter quidem, licitum: sicut patet de baptismo, qui (etiam posito, quòd sit in aqua rosacea, vel tenui cerevisia probabilius validus) extra casum necessitatis ne quidem est probabiliter licitus. & sic è converso accidere potest, ut quod est æqualiter probabile quoad valorem, sit ob circumstantias urgentes probabilius, vel certius quoad licentiam; v.g. in baptismo; nam posito (non affirmo) quòd sit æqualis probabilitas de valore aquæ rosacæ, potest quoad licentiam in casu necessitatis major esse probabilitas. dixi: *posito quòd sit æqualis probabilitas de valore*: ne quis mihi opponeret propositionem Innocent. XI. loquentem de *probabili & probabiliore* respectu valoris: & quidem extra casum necessitatis, contra sic extendentes. Jam igitur, cum dispensationes in rebus tam gravibus, non nisi ex gravissima & urgentissima necessitate peti, aut dari soleant, bene potest ex talium

cir-



circumstantiarum consideratione probabilior esse licentia , licèt validitas sit utrinque æquè probabilis: non ergo per has dispensationes probat DD. Perea, Summos Pontifices secutos esse in praxi sententiam minùs probabilem *de licentia* .

Quapropter sic argumentor . vel dicit DD.Perea, quòd in casu illarum dispensationum , specialiter in matrimonio , fuerit major probabilitas de valore, vel æqualis, vel minor? si major, habebitur eo ipso major probabilitas , imò & certitudo de licentia , pro casu necessitatis : ut patet de baptismo , quem non facilè aliquis negaverit , licitè & etiam obligatoriè conferri in materia, probabiliùs valida , ubi casus necessitatis id exegerit . Si verò probabilitas de valore fuerit æqualis ; tunc vel dicit DD.Perea, quòd fuerit conjuncta cum probabilitate licentiæ, vel non ? si non: ergo dicit Summos Pontifices contra, vota solemnia, & matrimonia id fecisse, quod erat omnino illicitum . Si verò dicit, illam valoris probabilitatem fuisse conjunctam cum probabilitate licentiæ: facilè nos ostendemus , hanc probabilitatem fuisse non quamcunque, sed majorem probabilitatem . quod enim ex gravissimis causis sit licitum , non  
 fim-


simpliciter, sed probabilius sit licitū: sed tales dispensationes, quæ ponuntur factæ licitæ, ex gravissimis causis tales factæ sunt: aliter enim ne quidem petuntur; & si peterentur, nunquam tamen darentur: ergo factæ sunt probabilius licitæ: ergo Summi Pontifices in illis dispensationibus non contra, sed juxta nostram doctrinam, hoc est, secundum probabilius de licentia, processerunt: ergo RR. P. Generalis, quando dissertat. 14. num. 44. dicit, illas dispensationes ab illis Summis Pontificibus fuisse habitas pro probabilius licitis, non falsò, & purè divinando, prout Perea, num. 238. calumniatur, sed pro summa sua in Sedem Apostolicam reverentia, & singulari acumine ingenii, ac eruditione dixit. Quod si denique dicat DD. probabilitatem de valore illarum dispensationum, fuisse minorem: ergo dum pro se allegat factum & praxes Pontificum, ait, illos Summos Pontifices practicasse res ab Ecclesia damnatas. Probo. Innocentius XI. damnavit hanc propositionem: *non est illicitum in Sacramentis conferendis sequi probabilem de valore Sacramenti relicta probabiliori*: atqui illi Pontifices, si fuit in illis dispensationibus minor probabilitas valoris,

loris , practicarunt tanquam non illicitum , in Sacramentis conferendis [ administrando nempe alio matrimonio ] sequi probabilem de valore Sacramenti , relicta probabiliore : nempe de permanentia impedimenti invalidantis : ergo secundum Pream Summi Pontifices , dum eos ait sibi favere , practicarunt res , ab Ecclesia damnatas . quo quid posset esse intolerabilius ? quàm videlicet ita discurrere , ut dicas , Summos Pontifices , eosque Sanctissimos , ac summè pios [ quales sunt , quos pro dispensatione matrimonii rati nominat inter alios num. 235. Perea , Paulus III. Gregorius III. Pius IV. & Pius V. ] fuisse ab Ecclesia damnatos ?

Hæc sanè indignitas Perea , ita me commovet , ut librum tuum post januam abjiciam . quare ab ulteriori refutatione abstineo , nec progredior ad Animadversiones , quas à pag. 161. usque ad pag. 248. in gravissimos viros ac Magistros , Gonetum , Muniellam , Fagnanum , Palancum , RR. meum P. Generalem Thyrsus , per distinctas Sectiones , non minùs impudenter , quàm indoctè facis . Quas licèt illi religiosè tibi condonent : hanc tamen , quòd tam imperitè disputas ,

tes, ut Summos Pontifices , ac sanctissimos , doctissimosque anathemati subicias ; meritò Sanctissimæ Sedi Apostolicæ vindicandam , animadvertendamque relinquunt .

A. M. D. G.



1.007.7913